

Planti manmeri sori long lukim sip bilong Luteran siping - P4



Papua Hahine nau i gat opis - P8



Misel i stap long AOG konvensen kem - P15



PIH Saveman *Nius* Globeathon wokabaut long pinisim kensa long ol meri.. Pes 7 na 14

# Nupela ges sevis bilong ol pipel

Lokel bisnis kampani i go pas...  
Sevis bai kam long haus dua...  
Mani kam bek insait long kantri...

Isaac Liri i raitim

CANAAN Gas Distributors, wanpela lokel ritel bisnis, bai wok bung wantaim bikipela gas kampani, Origin Gas, long mekim isi gas sevis i go long ol manmeri.

Dispela nupela sevis bai kamap long Pot Mosbi na bihain bai go long ol arapela senta long kantri.

Dispela sevis bai lukim Canaan i bringim sevis i go long kastoma husat i save yusim gas long haus bilong ol. "Ol pipel bai no inap long go painim sevis, Canaan bai bringim sevis i kam long haus bilong ol," Menesing Dairekta bilong Canaan, Paul Gabriel Morris i tok.

I go moa long pes 2...



1,000 manmeri na pikinini i wokabaut go daun long PIH 3-Mail maunten rot na i go long Taurama Rot long stat bilong Globeathon wokabaut long Sande 28 Septemba. *Poto: Nicky Bernard.*

*Moa piksa long wokabaut i stap long pes 14*

## MORE FLIGHTS TO CHOOSE FROM

✓  
PORT MORESBY TO LAE v.v.  
4-5 x DAILY FLIGHTS

✓  
PORT MORESBY TO MT.HAGEN v.v.  
4 x DAILY FLIGHTS

✓  
PORT MORESBY TO RABAU v.v.  
2-4 x DAILY FLIGHTS

✓  
PORT MORESBY TO GOROKA v.v.  
2 x DAILY FLIGHTS

✓  
PORT MORESBY TO ALOTAU v.v.  
DAILY F100 FLIGHTS

✓  
PORT MORESBY TO DARU v.v.  
3 x WEEKLY FLIGHTS

✓  
PORT MORESBY TO CHIMBU v.v.  
3 x WEEKLY FLIGHTS

✓  
PORT MORESBY TO MENDI v.v.  
3 x WEEKLY FLIGHTS

# Taim bilong nesanel eksem long PNG

**NESENEL eksem o tes bilong ol gret 8, 10 na 12 long dispela yia i stat pinis long Tunde dispela wik insait long kantri.**

Ol gret 10 insait long Papua Niugini i statim pinis tes bilong ol we bai kisim tupela wik olgeta long pinis na bihain bai gret 12 na gret 8.

Seketeri bilong Edukesen Dokta Michael Tapo i tok eksem bilong ol gret 8 bai kisim foapela de na bilong gret 10 na 12 bai ron long tupela wik.

Namba olsem 54,000 gret 10 in-

sait long kantri i sindaun pinis long tes bilong ol we i stat long Septemba 30 na bai go pinis long Oktoba 10. Long gret 12, namba olsem 21000 skul pikinini insait long kantri bai statim tes bilong ol long Oktoba 13 go pinis long Oktoba 24.

Long Oktoba 27 go long Oktoba 30 em taim bilong ol gret 8 we namba bilong ol i olsem 116,000 insait long kantri.

**Gret 10 Tes** – Maths (Tunde 30 Septemba 2014, Business Studies

(Trinde 1 Oktoba 2014), Agriculture (Fonde 2 Oktoba 2014), Social Science (Fraide 3 Oktoba 2014), Science (Mande 6 Oktoba 2014), Arts (Tunde 7 Oktoba 2014), Design & Technology (Trinde 8 Oktoba 2014), Personal Development (Fonde 9 Oktoba 2014), English (Fraide 10 Oktoba 2014).

**Gret 12 Tes** – Advanced Mathematics Paper 1 na General Mathematics Paper 1 (Mande 13 Oktoba 2014, Biology na ICT (Tunde 14 Oktoba 2014), Physics na Legal

Studies (Trinde 15 Oktoba 2014), Geography (Fonde 16 Oktoba 2014), Language & Literature na Applied English (Fraide 17 Oktoba 2014).

**Gret 8 Tes** – English Language 1 (Mande 27 Oktoba 2014), Mathematics (Tunde 28 Oktoba 2014), Combine Subjects (Trinde 29 Oktoba 2014), English Language P2 (Fonde 30 Oktoba 2014).

Pinis bilong ol dispela nesanel eksem bai ol studens ken kisim setifiket bilong ol we ol gret 8 bai

kisim certificate of Basic Education, Gret 10 bai kisim Lower Secondary School Certificate na ol Gret 12 studen bai kisim Upper Secondary School Certificate. Ol dispela setifiket em bikpela samting tru bikos bai i helpim ol student long go antap long ol bikpela skul olsem long ol kolis na yunivesiti na ol arapela teknikel trening skul.

Dokta Tapo i mekim tok amamas na wanbel long olgeta sumatin long dispela taim bilong nesanel eksem insait long kantri.



Planti ol tisa olsem dispela long Kalik praimer long Karkar ailan no save yet long nupela SBE karikulum.

## Ol tisa long PNG no redi yet long nupela SBE karikulum

**JAMES G. KILA i raitim**

**NAMBA 15 Edukesen Kongres o kibung bilong long Madang long Trinde, Septemba 17 i luksave olsem i gat planti hevi i stap yet long senis we bai kamap long senisim autkam bes edukesen (OBE) i go long nupela stendet bes edukesen (SBE).**

Bikpela hevi i pas long no gat gutpela trening ol tisa i kisim long sait bilong dispela SBE karikulum o rot long skulim ol pikinini.

Kongres long Madang i painimaut olsem ol tisa long kantri long i no redi long tisim nupela karikulum ya, bikos ol i no save long rot wanem samting long bihainim.

Planti lain husat i makim ol provinsal Edukesen divisin bilong ol provins, na tu ol tisa na PNG Tising Sevis Komisnin i bringim bel-hevi bilong ol long dispela kongres o bikpela miting. Kongres i bin kamap long Madang Risot Hotel.

Ol i askim planti kain kain kwesten i go long Deputi Seketeri bilong Edukesen, Dokta Ephraim Apelis long wanem wok i kamap pinis long senis

Sampela i sutim tok long Nesanel Edukesen Dipatmen long nogat aweanes bilong en long

dispela nupela SBE karikulum. Ol i tok dipatmen i toktok tasol na i no kamapim aweanes o givim insevis trening long ol praimer skul tisa long kantri long save gut long rot bilong yusim dispela nupela karikulum. Kongres long Madang i tokim

Dokta Apelis tu olsem sampela kain wok plen na askim i mas go nau long Nesanel Gavman long putim mani long kamapim trening bilong ol tisa insait long kantri long stap long insevis long save moa long dispela nupela SBE karikulum..

## Iligel Hi –Lo Loteri bikpela long Hailens

**Stanley Nondol i raitim**

NESENEL Geming na Kontrol Bod (NGCB) i givim tok lukaut i go long husat i mekim iligel bisnis long Hi-Lo loteri long Hailens i mas stop bikos em i tambu aninit long ol bilong kantri.

Sapos husat i go het na mekim dispela bisnis bai lo i mekim sav long ol.

Dispela Hi-Lo em gem i gat masin, na ol manmeri i betim mani long papa bilong bisnis na makim namba bilong bal na masin i ranim bal gem.

NGCB long wanpela pablik notis i tok dispela em iligel gem, ol opereta i kisim dispela Hi-Lo loteri gem i go long Hailens na mekim bisnis long Porgera, Hagen na long Jiwaka provins.

Ekting Sif Eksekutiv Opis (CEO) bilong NGCB, imelda Agon i tok bod i mekim wok painim long

dispelailigel loteri na husat i mekim dispela bisnis bai kisim mekim save bilong loa.

Em i tok moa olsem Nesanel Kot i tokaut olsem Hi-Lo gem i tambu long kantri.

NGCB i tok husat man o meri i mekim dispela bisnis, helpim long putim dispela bisnis o ejen bilong kampani long ples ol i mekim dispela iligel bisnis mas kwiktaim stopim bai go long kamabus o baim kot fain sapos lo i kisim ol.

Mis Agon i tok Hi-Lo loteri gem em i tambu long kantri

Long Februari 2008 long Nesnel Geset namba 22, NGCB aninit long Geming Kontrol Ekt 2007 em i wanpela gavaman bodi tasol long olgeta laisens bilong geming na loteri insait long kantri.

No gat wanpela ejensi o gavman bodi long nesanel o provinsal gavman i gat pawa long givim tok orait o

kontrolim geming na loteri long kantri.

NGCB long narapela pablik notis i no long taim i go pinis i toksave olsem Hi-Lo loteri, hos res masin we NGCB i putim tok-tambu long en i lukim sampela lain ironim dispela bisnis long planti hap long kantri maski kot i putim tambu long 2009.

NGCB i tok ol geming masin i wok long go het long planti hap long hailens rijon, wanpela bilong en em Hi-Lo loteri.

NGCB i tok planti bilong ol dispela lain i opret i no gat laisens.

Sampela bisnis lain i gat laik long mekim bisnis aninit long lo i kisim taim na weit bikos kot i stopip na wetim fainol disisen bilong kot.

NGCB i tok i gat kot oda istap na bogat wanpela man i bisnis i gat rait long mekim kain bisnis long laik bilong ol yet.

## Nupela gas sevis bilong ol pipel... I kam long pes 1...

Mista Morris i tok kampani bilong em i luksave olsem kantri na ol pipel i nidim planti gas long helpim ol long komyuniti olsem na ol i kamapim dispela nupela kain sevis.

Aninit long dispela sevis ol kastoma bai rejista na opim ol akaun bilong ol wantaim Canaan. Taim akaun bilong ol i stret, Canaan bai bringim gas sevis i go long ol.

Mista Morris i tok kampani bilong em bai nidim sapot bilong midia, na tu, ol arapela ogenaisesen.

Em i bin tok bikpela tok tenk yu i go long Fincorp na ANZ long givim mani long helpim dispela bisnis.

Origin Gas i amamas long sapotim wok na tingting bilong Canaan.

Jenerel Menesa bilong Origin Gas, Mis Lesieli Taviri, i tok ol i amamas long sapotim wanpela

lokel ritel bisnis, long wanem, mani bai go bek gen insait long kantri na strongim ikonomi.

Antap long dispela, Gavana bilong NCDC, Powes Parkop, i tok amamas long Origin Gas na Canaan long kamapim dispela kain sevis.

“Kantri bilong yumi i nidim planti dispela kain sevis long kamap long strongim lokel bisnis, na helpim ol komyuniti bilong yumi,” Gavana Parkop i tok.

Gavana i tok em i laikim planti liklik lokel bisnis long kamapim ol kain sevis olsem, na gavman bai sapotim.

Em i tok nau PNG Power i wok long kisim bikpela taim long kontrolim na givim sevis i go long ol hauslain long ol komyuniti, na gavman i laikim ol liklik bisnis olsem Canaan long wok bung wantaim ol bikpela bisnis kampani na go pas long bringim sevis.



Gavana Parkop i toktok wantaim Mista Morris na ol biklain bilong Origin Gas, Fincorp na ANZ. Foto: Isaac Liri

“Gas em i wanpela bikpela samting we i ken helpim yumi long planti rot, na yumi mas opim tingting bilong yumi na givim sans long ol lokel bisnis, na tu, ol arapela bikpela bisnis we gavman i

gat liklik se long en. Gavman i gat 33.3 pesen se long Origin Gas.

Gavana i makim maus bilong gavman na tok em i laikim ol arapela liklik bisnis long bihainim rot we Canaan i bihainim.

# Polye T.H.E Pati joinim Oposisen

Tasol 4-pela minista i tok ol bai stap yet wantaim O'Neill

Stanley Nondol  
i raitim



LIDA bilong T.H.E Pati,  
Don Polye.

LIDA bilong T.H.E Pati, Don Polye i tokaut olsem 14 memba pati bilong em i joinim oposisen na nogat wanpela memba i go aut.

Mista Polye i tok em i no lukluk tumas long kisim lidasip bilong oposisen olsem ol tok win i raun olsem taim Don Polye i joinim oposisen bai kisim oposisen lida posisen.

Mista Polye i tok aninit long Lo bilong politikel pati na kendidet na konstitusen bilong pati, 14 pela memba long pati bilong em i stap yet na nogat wanpela i lusim na go joinim narapela politikel pati.

Praim Minista Peter O'Neill i rausim T.H.E Pati long kolisen gavman bihain long em i rausim Don Polye long posisen bilong Treseri minista.

Mista O'Neill i tok kolisin gavman i mas wok bung long polisi na program bilong gavman tasol em i no gutpela long Pati bilong Don Polye i stap long gavman na sampela pati memba i holim minista posisen na lida bilong ol i go agensim polisi na disisen bilong gavman long planti taim.

Ol 4 pela memba bilong pati, Benjamin Poponawa (Minista bilong Leba na indastri), Delialah Gore (Minista bilong Komyuniti Developmen), Leo Dion (Deputi Praim Minista) na Douglas Tomuriea (Minista bilong Fores na Klaimet Senis) i bin tokaut olsem ol i lusim T.H.E Pati pinis na joinim PNC Pati bilong O'Neill.

Tasol mista Polye i tok i gat lo bilong Politikel pati na kendidet na konstitusen bilong pati i banisim olgeta memba bilong pati.

Konstitusen bilong T.H.E pati i tok klia olsem husat pati memba i laik joinim narapela i mas kisim tok orait long pati. Tasol bihain long pati i glasim gut as bilong ol memba i laik lusim, i no bin givim tok orait na ol 4-pela minista long O'Neill gavman i stap memba bilong T.H.E pati yet.

Mista Polye i tok inters o laik bilong em i no long kisim posisen bilong oposisen lida. Em i tok bikpela samting em long glasim wok bilong gavman na stap kamap strongpela was dok bilong gavman.

Oposisen lida Belden Namah na Misat Polye wantaim i tok em i no impoten long husat i kamap oposisen lida, tupela i tok bikpela samting em long kantri i mas save sapos O'Neill gavman i ranim gavman na menesim mani bilong kantri gut aninit long loa.

Minista bilong Fores, Douglas Tomuriea, Delialah Gore na Benjamain Poponawa i tok ol i lusim pinis T.H.E Pati na joinim PNC pati.

Praim Minista Peter O'Neill i tok ol lida husat i laik lusim pati ol i stap na laik joinim narapela em laik bilong ol. Nogat wanpela mani bosim ol. Ol i kisim mendet long ol pipel ol i makim na mas i gat rispek long disisen bilong ol.

Ol 4-pela minista i tok ol bai stap wantaim gavman yet na i no inap mov i go long oposisen wantaim Don Polye.

Mista Polye bai lusim namel bens sia na sidaun wantaim oposisen taim palamen i bung gen long Oktoba 21.



Praim Minista Peter O'Neill insait long haus palamen dispela wik, taim em i bin lonsim T.B Awenes Kempein insait long haus palamen long dispela wik. Em i singaut long olgeta Papua Niugini sitisen i mas pait long daunim T.B wantaim em. Foto: Nicky Bernard

**BSP Smart Business**  
6013 0123 4567 8910  
06/17  
Mrs Bank S Pacific

**grow. business**

"A BSP Smart Business Loan helped my small home operation rise to become a Smarter Business."

Ginia Siaguru  
Business Owner of Tapioca Delight

320 1212 / 7030 1212 - 24/7  
servicebsp@bsp.com.pg  
www.bsp.com.pg

**BSP** Proudly supporting PNG and the Pacific

# Planti manmeri sori long lukim ol sip bilong Lutheran Siping

James G. i raitim

**PLANTI ol manmeri long pablik na ol memba bilong Evanjeliko Lutheran Sios bilong PNG long Madang provins sore na wari tru long lukim ol sip bilong Lutheran Shipping (Luship) i silip sore nau long basis long Madang.**

Ol dispela sip i gat rekot long sevimi planti ol ruel ples insait long Mamose na Niugini ailan rijon insait long planti yia i go pinis na i save halivim long karim ol bikpela kago. Tasol sore tru, nau ol sip ya i silip sore na ros i stap long Madang sip yad na dispela i bringim sore long bel bilong planti manmeri tru.

Operesen bilong Lutheran Shipping i bin stop long Me 26, 2014 bihain long wanpela likwideta ol i makim long salim ol sip na ol arapela propeti bilong kampani.

Toktok na ol niuspepa ripot long salim ol samting bilong Lutheran Shipping i bikpela tru long midia, tasol nau yet ol turangu sip i silip sore i stap long Madang haba.

Lutheran Shipping i bin stat wok

long sevimi ol pipel bilong PNG long Momase na Niugini ailan moa long 100 yia, tasol i bin stopim operesen bilong en bihain long hevi long sait long menesmen insait long las faipela yia.

Planti ol lain long Madang nau i ken lukim ol sip bilong Luship na i wari stret na sore na mekim kain kain toktok olsem moabeta Nesanel Gavman o wanpela PNG kampani i mas baim ol sip na bringim ap gen operesen.

Wanpela kaunsila blong Finshafen, Okam Siki i tokim Wantok Niuspepa olsem em i wari bikos Luship i save bringim ol siping sevises long ol ruel ples long Morobe provins, tasol nau ol manmeri i save kisim hatpela taim stret.

Ripot i bin kamaut olsem wanpela nupela siping kampani, Morobe Coast Shipping Ltd, sampela lain i statim long sevimi ol ples we Luship i save ron long en, tasol dispela i no kamap.

Kaunsila Siki i tok Gavman i mas lukluk long hevi bilong Luship na sapotim na traim bringim em kambek gen.



Poto i soim kago sip bilong Luship Mv Kuder na pasindia bot Mv Mamose Express i silip sore long Madang haba i stap wetim lain i gat intares long baim ol. Poto: James G. Kila

## “K50m em praivet mani bilong mi”, Namah

Stanely Nondol i raitim

OPOSISEN lida Belden Namah i tokaut olsem K50 milien em yusim long sapotim ol kendidet bilong em long 2012 ileksen em praive mani bilong em.

Mista Namah i mekim dispela tok klia long pablik bihain long Praim Minista O’Neill i putim komplem long Obusmen Komisn long mekim wok painim long Namah yusim K50 milien. Tasol Obusmen Komisn i tok ol bai nonap mekim wok painim long dispela.

Mista Namah i tokaut olsem K50 milien em yusim long 2012 ileksen em praivet mani bilong em. Em i tok em bin bisnisan pastaim na bihain i kamap memba bilong Vanimo Grin.

Mista Namah i tok wanpela taim em bin kisim Praim Minista O’Neill i go long Bewani we i gat fores bisnis bilong em. Em i tok O’Neill i lukim long ai bilong em ol bisnis bilong mi.

Obusman i tok em i

wok bilong opis bilong politikel pati na kendidet.

Tasol Mista O’Neill i autim belwari olsem Mista Namah i tok em bin yusim K50 milien long 2012 ileksen na wok painim i mas kamap long dispela.

Mista O’Neill long wanpela pas bilong em i go long Sif Obusman i tok pablik i kisim tingting olsem Obusman i mekim wansait long wanpela o sampela man. Na Obusman i mas mekim stretpela wok long olgeta komplem ol i kisim long pablik.

Praim Minista O’Neill i tok dispela komplem bilong em long K50 milien em bilong pablik i mas save Mista Namah i kisim mani long wanem hap long yusim long sanapim ol kendidet bilong em long 2012 na Obusman Komisn i mas mekim wok painim long dispela.

Mista O’Neill i tok Obusman i mas noken lusim dispela.

Opis bilong politikel pati na kendidet i les long mekim sampela toktok long dispela taim mipela i askim long bikos Obusman

i tok em wok bilong Opis bilong Politikel pati na kendidet.

Mista Namah i tok em bin givim akuitel o fainensel ripot long Opis bilong Politikel aninit long lo na i tok klia long rot PNG Pati bilong em i yusim mani long 2012 ileksen.

Mista Namah i tok ol politikel lida i mas noken traim long yusim politikel pawa bilong ol long pablik opis.

Em i tok ol lida i mas rispektim wok bilong ol konstitusen opis.

Mista Namah i mekim dispela toktok bihain long Ptaim Minista O’Neill i tok bilong wanem na Obusman i no laik long mekim wok painim long Namah na salim i go long Opis bilong Politikel Pati na Kendidet long mekim.

Mista Namah i tok “sapos Obusman i lukim olsem mi gat asua na singauim mi long intaviu, bai mi go. Mi bai nonap ronawe olsem ol nara-pela lida yusim pawa long abrusim mekim save bilong lo bilong kantri.

## Ramu NiCo (MCC) mekim wok bihainim MOA

DIVELOPA bilong bikpela nikel/kobalt main long kantri, Ramu NiCo Menesmen (MCC) Limited i tokaut olsem em i kamapim planti infrastraksa developmen wok we kampani i mas wokim aninit long 2000 memorandum ov agrimen (MOA).

Ramu NiCo Komyuniti Afes Jeneral Menesa, Martin Paining i tok planti long ol Sosel Ikonmik Developmen Program (SEDP) aninit long MOA na ol spin-of helpim olsem medikol na edukesen komitmen aninit long MOA em Kampani i kamapim pinis na i bai go het yet long wokim kamap.

Ramu NiCo Projek long las wiken i givim ripot bilong en long Eking Maining Minista, Mista Mori.

Olgeta wok em i wokim aninit long

2000 MOA na nau i stap strong yet long wok long 2013 rivais MOA.

Mista Mori i tok amamas long presentesen bilong olgeta lain long las wiken, na i laikim olgeta lain long stretim wanem ol hevi i stap pas-taimlong arapela hevi ken i kamap.

Mista Mori i askim divelopa Ramu NiCo (MCC) long wok gut wantaim Madang Provinsal Gavman long stretim ol hevi long provinsal level, na wok bung long lukim olsem Projek i bringim gutpela helpim na sevis i go long ol pipel.

Mista Mori i askim olgeta lenona kampani insait long Ramu NiCo Projek na ol lida bilong ol long menesim gut wanem wok i kamap na bisnis i ken gro na divelopa bai luksave na sapotim ol.

Eking Provinsal Edministreta bilong Madang, Daniel Alo i tokaut olsem edministresen bilong Madang bai wok gut wantaim olgeta lain pati insait long Projek.

Mista Alo i tokim ol lain papa-graun na Nesanel Gavman olsem Madang Provinsal Edministresen bai wokim kamap wanem samting em i mas wokim o komitmen bilong en long Ramu NiCo Projek.

Siaman bilong KBK Lenona Asos-esin (LOA), Mathew Dengua i tok amamas long Nesanel Gavman long luksave na kamapim ol wok insait long komitmen bilong en aninit long MOA. Ol dispela projek i bringim gutpela helpim long ol pipel long Projek eria.



Ramu NiCo i wokim kamap dispela klasrum long Naru Praimeri skul aninit long 2000 MOA.

# PIH makim kensa awenes – Globeathon

Frieda Sila Kana i raitim

**PASIFIK Intenesenel haus sik wantaim ol patna bilong en olsem Pot Mosbi Jeneral Hausik i givim luksave long wok bilong awenes na edukesen long kensa bilong ol meri wantaim wanpela sotpela wokabaut insait long Mosbi siti long Sande 28 Septemba.**

Em i namba tu globeathon wokabaut i kamap. Dispela yia em i kamap gutpela moa wantaim 1,000 manmeri na ol midia lain i wokabaut. Las yia i bin gutpela tru wantaim 500 manmeri na pikinini i wokabaut. Bihain long wokabaut long las yia planti meri moa i kisim save long hevi bilong sik kensa.

Globeathon em i wanpela spesol wokaton we moa long 60 kantri long wol i save holim long kirapim tingting bilong ol meri na ol famili long hevi nau i stap long kensa long ol meri. Ol ripot long wol i tok olsem samting olsem 19 pesen nupela lain i kisim sik long wan wan yia em ol lain i save kisim sik kensa. insait long PNG klostu 1,500 meri i save kisim bagarap long dispela kain sik kensa long wan wan yia.

Hai Komisina bilong India, Siaman bilong PIH, Sir Moi Ave, Dadi Toka Jr. Sif Eksekutiv Opisa bilong Kensa Faundesen, na Tura Kokomo, maskot bilong 2015 Pasifik Gems, mipela i laik mekim dispela 'PIH Toksave' long givim moa toksave na skul long kensa bilong ol meri, we i save kamap long ol hap bodi bilong kamapim bebi.

Dokta Sapuri, namba wan dokta bilong ol meri long PIH i tok, 'dispela em i bikpela de bilong ol meri bilong wanem em i toktok long laip bilong ol. Las wik mipela kisim wanpela meri i kam long Bialla long Wes Nu Briten. Dispela meri i kam kisim tes na mipela lukim sevaikel kensa i stat long kamap long en. Mipela i katim na rausim hap i gat sik na em i orait na i go bek pinis long ples. Long wankain stori i gat narapela merit u i bin kam long imejensi long Wewak tasol dispela meri em sik bilong em i kisim stes 4 pinis. Mipela i traime bes long helpim em tasol i hat na mipela salim em go bek na 3 wik go pinis em i dai long sevaikel kensa. Ol meri i mas kisim save long wanem hap ol i ken kisim gutpela toksave na helpim.'

Meri bilong PM, Lady Linda Babao O'Neill, husat i embeseda bilong PNG Kensa Faundesen i bin kamap long dispela wokabaut wantaim Gavana Jeneral, Gren Sif Sir Michael Ogio. Em i tok em i amamas long lukim planti pipel i kamap long globeathon wokabaut long strongim toktok bilong ol meri i mas sekap hariap na luksave long sik kensa binatang hariap na bai ol i ken sevim ol yet.

"Yumi ol mama i save putim helt na gutpela laip bilong ol man bilong yumi, pikinini na ol narapela i go pas tru long yumi yet. Nau mi laik tok olsem yumi ol meri i mas lukautim helt bilong yumi. ekksesais planti, kaikai gutpela nutrisen kaikai na sekap wantaim ol dokta long helt bilong yu. Mekim taim long sekim yu yet. Yumi bai i no inap long helpim famili bilong yumi sapos yumi sik o no gat yu dai na yumi no stap moa long lukautim ol," Misis O'Neill i tok.

Gren Sif, Sir Michael Ogio i tok 40 yia i go pinis nupela PNG i bin gat ol sik bilong ples na i gat we bilong gples long daunim ol dispela sik. Tasol i kam long 20 yia bihain nau i gat ol narapela sik i kamap olsem kensa we yumi save kisim lon gpasin bilong kaikai na stap long ol siti na taun.

"Mi gat bikpela wari long bikpela namba bilong sik kensa long komyuniti tasol ol komyuniti i no luk olsem ol i no save long dispela bagarap i stap," em i tok.

"Moa long 1800 meri long PNG i dai long sik kensa na 2.9 milien long wol olgeta yia. Olsem na mi tok amamas long yupela ol helt woka na ol dokta. Yupela mekim gutpela wok na yu mas go het yet olsem!" em i tok.

Sir Michael i singaut long ol meri i mas go long kisim sekap olgeta taim, stap gut wantaim helt laip, kaikai gutpela kaikai, ekksesais.


Lae Bisket Kampani i bin givim ol bisket na Supreme indastri i givim ol wara long ol lain i wokabaut.



1. Lady Linda Babao O'Neill, embeseda bilong PNG Kensa Faundesen amamas long Tura. Poto: Nicky Bernard

2. Wantok Tim sanap kisim poto wantaim PIH Maketing Menesa, Joel Sarmenta bipo ol i wokabaut. Poto: Wantok ripota.

3. Ol yangpela i go pas long globeathon. Gutpela long planti yangpela i wokabaut na kisim toksave long ol i ken senisim pasin bilong ol na toksave long narapela. Poto: Wantok ripota.



### Yumi Stori long PNG LNG

Wantaim Peter Graham, CBE  
Manesing Dairekta, ExxonMobil PNG Limited

I gat wanpela samting mi ting olgeta lain bai wanbel long en: Papua Niugini em i wanpela naispela na spesol ples tru long graun. Mi stap hia inap sevenpela yia nau na mi laki tru long lukim sampela naispela ples na ol samting long dispela kantri, long taim mi raun i go long ol provins.

Sampela trupela toktok hia em mi save planti pipel i harim pinis (tasol mi ting i narakain tru olsem na mi laik stori gen long ol): PNG i gat namel long seven na ten pesen bilong baioadaivesiti, o ol kain kain enimal na ol samting i gro long bus na wara, long wol; dispela em i bikpela namba tru long wol. Bungim wantaim Wes Papua (Indonesia) dispela bikpela alian bilong Niugini i holim namba tri bikpela renfores o bikbus long wol, we ol man i no bagarapim yet, bihain long Amason na Kongo.

Long dispela as, long taim mipela i mekim konstraksen wok long PNG LNG Projek mipela i bin was gut tru long daunim hevi i kamap long envairomen olsem bai i no gat bagarap i kamap. Mipela i bin mekim olsem long namba wan de yet, bipo long wanpela wok bilong statim Projek i kamap.

Wantaim helpim bilong ol savelain, mipela i kamapim strongpela Environmental and Social Management Plan (yu ken lukim long website bilong mipela long pnglng.com) we i soim wanem kain bagarap i ken kamap long envairomen, na wanem rot inap long abrurim o daunim bikpela bagarap i kamap. Mipela i bihainim lo bilong gavman, na mipela i kamapim wanpela Environmental Impact Statement (i stap tu long website bilong mipela) we i gat moa long 6,000 pes bilong ol stadi na plen.

Sampela taim ol i ken raitim ol plen, developin na kisim tokorait, tasol bai plen i sindaun nating i stap na das i karamapim. Bilong mipela i no olsem. Mipela i yusim plen bilong mipela long olgeta wok long taim bilong konstraksen, na nau i gat sampela senis long Environmental and Social Plan long go wantaim wok mipela i mekim nau na long ol prodaksen wok bai kamap long bihain taim.

Kaikai bilong en i stap ples klia long ol risal bilong wok. Long PNG Plent, maski i gat ol developin na wok i kamap, i gat planti ol pisin, sikau na kuka i stap yet. Mi amamas tru long ol nupela kain samting mipela i painim long taim mipela i wokim dispela 300 kilomita onso paipain. Long taim bilong painim rot bilong putim paipain, na long taim bilong

wokim sevei bipo long konstraksen i stat, na long taim bilong konstraksen bilong paipain, mipela i painim 16 nupela kain diwai samting, faivpela enimal olsem kapul, 11-pela palai, 60 rokrok na wanpela blakbokis.

Mi kirap nogut olsem i bin gat planti wok painimaut i kamap pinis long dispela kantri, tasol mipela i wok long painim moa nupela enimal na arapela samting – dispela i soim olsem i gat planti kain kain enimal na ol diwai na arapela samting bilong bus na wara i stap hia!

PNG em i wanpela kantri we i gat kain kain kalsa na ol pipel, husat i pas strong long envairomen bilong ol. Olgeta yia mipela selebretim PNG Independens De long opis bilong mipela na long ol sait bilong mipela long PNG na olgeta yia mi save kirap nogut long lukim kain kain bilas na kastom – na ol woklain bilong mipela i amamas long soim pasin tumbuna bilong ol.

Ol dispela pasin i soim olsem PNG i spesol, olsem na mipela i strong yet long wok klostu wantaim ol komyuniti na lokal na nesanel gavman long lukautim na wok gut wantaim ol samting bilong tumbuna long Projek eria.

Ol wok bilong mipela i kamap long wei i soim rispek long ol pasin tumbuna o kalsa heritej bilong Papua Niugini na histori bilong ol komyuniti long ol ples we mipela i wok long en. Mipela i no painim ol nupela enimal na diwai tasol, nogat – long taim bilong konstraksen wok, mipela i bin painim moa long 500 ol samting bilong tumbuna. Mipela i givim 240 bilong ol dispela samting i go long Nesanel Museum, mipela givim sampela i go bek long ol pipel, na ol arapela em ol ples i gat stori long en.

Wanpela bikpela samting mipela i bin painim em lapita poteri long PNG Plent, dispela em wanpela kain sospen graun ol saveman i tok krismas bilong en i moa long 3,800 yia. Em i namba wan taim long ol i painim kain sospen graun olsem long bikples Niugini na i helpim ol akiolojis long save gut long rot ol pipel i bihainim na we ol i go sindaun na kalsa bilong ol.

Ol dispela samting i helpim long save gut long stori bilong PNG. Mipela i wok bung wantaim PNG Nesanel Museum long raitim daun we ol i painim ol dispela samting, na long dispela rot, Projek i helpim long lukim olsem wanpela hap histori bilong Papua Niugini bai i no inap lus.

I no longtaim Papua Niugini i bin selebretim Independens De, na kantri i gat planti as long amamas. Mi hop yupela olgeta i ritim dispela kolum i amamas tu long naispela envairomen na kalsa bilong yupela.

Gutpela de!

Mi laik save long tingting bilong yu, na wanem samting yu laik ritim long dispela kolum, pls salim email i kam long pnglngproject@exxonmobil.com o lukim mipela long www.pnglng.com.

# Papua Hahine nau i gat opis

**Frieda Sila Kana i raitim**

**PAPUA Hahine Sosel Eksen Forum (PHSAF) em i wanpela NGO i save wok long stretim hevi bilong ol meri long ol Sauten Rijon provins bilong PNG.**

Moa long 10-pela yia dispela NGO i save mekim gutpela wok bilong edvokasi na edukesen long ol komyuniti, tasol ol i no gat wanpela hap long wok olsem opis. Long dispela yia wantaim helpim bilong Ox-fam Niu Silan, dispela ogenaesen i gat opis long Waigani klostu long Laiplain senta.

Ox-fam i helpim ol long stretim dispela hap haus na gen bai ol i baim rent long Laiplain. I gat tupela pulitaim wokmeri tasol ol narapela memba em ol i wok olsem ol volantia. Nau yet Ox-fam i wok tasol long NCD na Sentral provins bikos i no gat mani long go aut long ol narapela provins bilong Sauten rijon.

Dispela yia ol i lukluk long wanpela program tasol na dispela em bilong pinisim vailens long ol meri.

Presiden bilong Papua Hahine, Mathilda Koma i tok Ox-Fram i

helpim ol wantaim K100,000 long 2013 long baim ol risos o samting bilong ranim wok. Long dispela yia ol i helpim ol gen wantaim K80,000 long ronim ol operesen na bikpela program bilong ol.

Wantaim dispela mani, Papua Hahine i stretim haus bilong opis na hap bai go long baim rent na statim opis bilong ol. Long taim PHSAF i stat long 2007 i kam inap 2013 ol i no bin gat gutpela opis bilong wok bikos ol i no gat mani long mekim dispela. Planti bilong ol meri i wok insait long dispela forum em ol volantia tasol. Ol i save wok long haus tasol na mekim wok edvokasi na edukesen long ol meri long Sauten rijon.

Ol narapela wok bilong PHSAF em kaunseling bilong meri na famili na long wok bilong 'Male Edvokasi'. Nesenel Gaming Kontrol Bot i givim mani long ranim program bilong ol man i sanap long strongim wok bilong pinisim pasin bilong man i paitim na bagarapim meri.

Ol arapela we bilong ol i kisim mani em long holim kopret dina we ol i save kisim sapot i kam long ol kampani, gavman opis na ol memba bilong Palamen.



Ol Ox-fam komiti na woklain

## Yangpela Lida Awot bilong Kwin

OL yangpela lida bilong Papua Niugini i mas nominetim nem bilong ol o aplai long Yangpela Lida Awot bilong Kwin.

Dispela awot i luksave long ol yangpela meri krismas bilong ol 18 i go long 29 lida bilong ol Komonwelt kantri husat i save mekim wok long helpim komyuniti insait long hatpela taim olsem taim bilong bagrap o taim bilong bikpela pait.

Dispela narakain Awot bilong senisim laip bai givim wanpela karamap presen long husat i winim. Dispela karamap bai i gat trening na mentoring na wanpela wik long stap na skul long Yunaitet Kingdom pastaim long ol i kisim Awot bilong ol long han bilong Kwin stret.

Wantaim sapot bilong dispela, ol wina bilong Awot bai mas givim wok yet long wanem samting ol i wokim i stap nau long komyuniti bilong ol.

Wanpela aplikesen o nominesen bilong kisim awot i mas soim wok ekspiriens bilong em long wok insait long komyuniti long stretim sindaun bilong ol pipel long lokal, nesenel na rijinol level.

Em i mas gat hanmak long soim; krismas bilong em i mas namel long 18 na 28 pas-taim long 16 Disemba 2014 em bai ol lain i winim Awot i ken pinis taim ol i kisim 30 krismas na i no ken antap; em i sitisen bilong Komonwelt kantri; i mas soim pasin bilong gutpela lidasip na i mas gat gutpela referi bilong givim stori bilong wok bilong en.

Ol bai givim praioriti long ol lain husat i gat stori bilong winim kain kain hevi long kamapim wanem gol o tingting ol i gat long en. Dispela aplikesen bai pas long 10 Oktoba, 2014.

## Man Edvokasi long haus kalabus

PAPUA Niugini Koreksenel Sevis (PNGCS) i kirapim wanpela nupela program bilong ol Man Edvokasi long Biru Haus kalabus, Oro Provins.

Insait long dispela program ol bai wok wantaim ol man husat i bin kisim taim long pasin bilong pait, na tu kisim i go insait long Jenda Inklusen na Sosel Inklusen (GESI) polisi imple-mentesen.

Konsaltesen na trening em tupela bikpela hap bilong dispela program. Hap bilong konsaltesen i bin stat long mun Ogas wantaim Gavana bilong Oro, Garry Juffa na ol Provinsel Edministresen, Oro Komyuniti Bes Koreksenel (CBC), Famili Seksual Eksen Komiti (FSVAC), Biru Komanding Opisa (CO), Famili Seksual Vailens Yunit (FSVU) bilong Polis na PNG na Australia Lo na Jastis Program (PALJP) Edvaisa, Apolosi Bose.

Masta trena, Sajen David Yaka Mano bilong CS hetkwota i tok Man Edvokasi em i wanpela rot bilong sapotim ol meri long wok bilong kisim ol man na ol yangpela boi long toktok long ol



Mista John Kali, Seketeri bilong Pesonel menesmen givim setifiket long wanpela pablik sevan ii kisim namba wan bilong GESI trening long Mas dispela yia. Wantok file poto.

pren bilong ol long save moa long ol meri na ol yangpela gel na lusim ol pasin tumbuna na gi-aman tingting olsem ol mangi o boi ii rabisim ol meri.

"Dispela pasin i mekim na ol boi na ol papa i save paitim ol meri tumas bikos ol i save gat gi-aman tingting. Ol i no save rispekim ol meri. Planti taim ol papa na ol yangpela boi i no save

tingting long wanem kain bagarap ol i nap long givim long meri bilong ol, gelpren ol susa bilong ol, pikinini na mama bilong ol," Mista Yaka Mano i tok.

Training i gat foapela hap we bai kamap insait long wanpela yia we namba wan hap i stat pinis long las mun long Biru CS, Oro Provns.

Man Edvokasi program aninit

long GESI i laik yusim ol boi na ol papa long painimaut gut long wanem wok bilong ol insait long famili na sosaiti, na stretim sam-pela rong tingting ol i save gat long bipo yet i kam inap nau.

Em bai soim ol yangpela man na ol papa long askim kwesten bilong wanem na ol i save mekim dispela kain pasin long ol meri.

Insait long GESI Polisi we Min-ista bilong Pablik Sevis, Dokta Puka Temu, na Seketeri bilong Dipatmen bilong Pesonel Menesmen, John Kali i bin sainim, dis-ain bilong Man Edvokasi long PNG em bilong makim stret ol wok bilong ol yangpela man na ol papa insait long famili na sosaiti na long painim wanem rot ol i no bihainim na i kamapim ol hevi insait long famili, olsem pasin bilong paitim meri.

Mista Mano i tok, CS i gat bikpela bilip olsem taim dispela paillet projek i pinis long neks yia, ol bai skruim wankain program long ol narapela CS insititusen tu long kamap olsem hap program bilong stretim tingting bilong ol kalabus man husat i bin kisim taim long pasin bilong pait.

## Tok lukaut long ol meri long was gut

TOK lukaut i go aut long pablik, moa yet ol yangpela meri long lukautim ol yet gut long ol marit man i trikim ol wantaim mani na kisim ol i go long kar.

Bos bilong ol Polis long Mosbi siti, Suptenden Andy Bawa i wokim dispela tok lukaut bihain ol i kisim planti ripot na ol komplem long ol man we ol meri i no save long ol i wok long grisim ol wantaim mani na kisim ol i go long kar bilong ol.

Ol polis i putim ai nau long dispela samt-

ing bihain sampela pikinini meri na ol papamama i go long polis stesen na putim ripot long ol man i grisim ol meri na kisim ol i go long kar.

Mista Bawa i tok planti meri i bungim dispela hevi, tasol ol i no putim ripot long ol.

Em i tok long ol ripot polis i kisim, samt-ing ya i no kamap long wanpela hap bilong Mosbi siti long san na long nait, na long hap we no gat planti lain i stap long en.

Mista Bawa i tok planti ripot polis i kisim i

kamap long ol pikinini meri sumatin.

Em i askim tu komyuniti na pablik long kisim kar registresen namba, kala bilong kar we ol i lukim i mekim dispela kain pasin.

Em i askim strong ol papamama long givim gutpela tok stia i go long ol pikinini bilong ol, na long no ken toktok long ol man ol i no save long ol.

Em i tok polis i no save yet husat tru i wokim dispela kain pasin na Mista Bawa i askim pablik long helpim long holim pasim ol dispela kain man.



# PIH Saveman Nius

"I kam long Pacific International Hospital Port Moresby"

Ph: (675) 323 4400 Fax: (675) 323 4600 Website: www.pih.com.pg

## GLOBEATHON – PIH wokabaut

**LONG tok tenkyu long gutpela "Globeathon: Wokabaut bilong pinisim kensa long ol meri" long Sande 28 Septemba 2014, i go wantaim planti narapela kantri long Pasifik na Esia, we long Pot Mosbi i gat 1,000 lain i mas.**

Sampela askim i kam long PIH teks lain 7155-8866 na tu long taim PIH i go long redio FM-100 Komyuniti Kona program we Dokta Mathias Sapuri, Dokta Faye Cabrera na Joel Sarmenta i bin go toktok. Olgeta Trinde bilong namba tri wik bilong mun bai ol dokta bilong PIH i toktok long kain kain samting bilong strongim helt long 3 klok i go long 4 klok apinun. Narapela bilong dispela toktok long redio bai kamap long Oktoba 15.

**Ol sop bilong was was i ken kamapim sevaikel kensa o no gat? Bai yu was was long wara nating?**

No gat tru. Sevaikel kensa em i save kamap long wanpela vaires o binatang. Nem bilong em i HPV vaires, o (human papillomavirus), na em i stap long planti lain.

Em i no gat wanpela samting long ol komesel prodak o long kaikai we bai kamapim HPV. I gat planti kain HPV vaires tasol i gat 3-pela bilong ol tasol i save kamapim sevaikel kensa.

Ol lain i no ken toktok nating olsem vaires i nap go long ol meri sapos ol i kaikai wanpela kain kaikai o yusim wanpela kain samting i kamaut long pektori. Namba wan rot long kisim vaires em long taim man na meri i slip wantaim.

**Man bilong mi em i gat 8-pela krismas moa long mi. Long hap bilong mipela ol i save tok olsem sapos wanpela meri i slip wantaim wanpela bikpela man o lapun man em i ken kamapim sevaikel kensa. Em tru o nogat?**

Man i gat moa krismas o meri i no wanlain bilong man i no inap long kamapim sevaikel kensa nating. Dispela em sapos meri em i gat krismas aninit long 18 o 20 yia, em nau dispela meri inap long



Gavana Jeneral Gren Sif Sir Michael Ogio na meri bilong em Lady Esmie i bin go pas long wokabaut. Planti i kam wokabaut long dispela spesel de.  
Foto: Nicky Bernard.

kisim. Dispela em bikos bodi bilong meri i no kamap gut yet inap long kamapim pikinini.

Sapos man em i gat krismas i winim meri na sapos dispela man i bin save slip wantaim ol narapela meri bipo bihain em i bungim 18 yia meri, em i gat bikpela sans long em i ken gat HPV virus (tasol i no olgeta kain HPV i save kamapim sevaikel kensa, sampela tasol i ken kamapim sevaikel kensa).

Dokta Sapuri i bin toktok long redio olsem, "Sapos yu wanpela yangpela gel, krismas bilong yu i aninit long 18, na yu stat long slip wantaim man taim yu yangpela yet taim olgeta bodi bilong yu long kamapim pikinini i no bikpela gut yet long banisim yu long no ken kisim ol kain vaires na sapos yu slip wantaim wanpela man i gat HPV vaires na bodi bilong yu kisim sampela bagarap long taim yu slip wantaim em, bai yu inap kisim dispela varies.

Olgeta meri i gat 20 krismas na moa, i save gat gutpela banis long ol praivet bodi bilong ol. Sapos yu

wanpela meri husat i save skrap long slip wantaim kain kain man yu mas putim karamap guma bilong banisim yu long no ken kisim HPV vaires na givim long narapela man gen.

**Ausait long man i putim kondom, i gat narapela we ol meri i ken banisim ol yet long kisim HPV o nogat?**

I gat wanpela vaksin o banis marasin i stap nau we em i ken banisim ol meri long HPV vaires. Nem bilong dispela marasin em 'Gardasil vaksin' na PIH em i namba wan haus sik long PNG long holim na givim insait long PNG.

Dokta Cabrera i tok, "Sapos yu bin kisim Gardasil vaksin banis sut ya pinis, em yu gat strongpela banis moa long lukautim yu."

"Wantaim Garadasil banis marasin, sapos wanpela yangpela meri o boi i wanbel long slip wantaim tasol i no yusim karamap gumi, em i ken abrusim mak bilong kisim dispela vaires." Dokta Sapuri i tok tu olsem



Ol dokta i luksave olsem long ol narapela kantri, i gat opisel vaksinesen program we gavman i baim na ol i save givim sut long ol yangpela gel krismas i no winim 13 yia.

Wanpela lain i wokim namba wan wok long givim sut long ol yangpela gel em long Wes Nu Briten Provinsel gavman.

Ol i kisim helpim long wanpela ogenaesen bilong Australia na ol i kamapim vaksinesen program long provins.

**Ol meri bai save olsem wanem sapos ol i gat HPV vaires na sevaikel kensa?**

Em isi tru, long wanem meri i ken go isi tasol long mekim wanpela tes bilong 5 minit tasol na pe bilong em i no winim K150 long PIH. "Paip minit tasol na yu pinis nau," Dokta Cabrera i tok.

Dokta Sapuri i tok yu ken save long stori bilong yu bihain long 48 o 72 aua tasol. Nau tu yu ken go tasol long Visen Siti Klinik o PIH long wokim wanpela Pap Smia na yu no ken wokim apoinmen wantaim dokta.

Dispela tes we ol mama husat krismas bilong ol i winim 30 inap long go kisim long olgeta 2-3 yia taim, em isi long mekim tasol ol meri i no save mekim.

Long dispela wik mipela i harim olsem wanpela mama grup long Solomon Ailan i wok long askim long moa awenes i mas kamap long kantri bilong ol bikos sevaikel kensa i wok long go pas tru long kamapim dai bilong ol mama na ol yangpela meri, tasol ol meri i les long go long sekap bikos ol man i luk daun long ol lain husat i save go long mekim dispela kain tes.

Dispela i soim olsem Intenesenel Globeathon em i mas kamap olgeta taim long ol yia i kam bihain tu. Kensa em i wanpela sik we yumi ken stopim, olsem na em i taim nau long yumi mas traim long stopim dai bilong o mama bilong yumi, meri bilong yumi, susa bilong yumi na pikinini gel bilong yumi, long bikpela 'C'.

**{Yu ken salim askim bilong yu long SMS kam long PIH teklain 7155-8866}**

**Meri i no ken wari na tingting tumas!**

**Fi bilong sekap i no winim K150, long yu ken kisim wanpela Pap smear tes bilong sekim sevaikel kensa, na em i ken luksave long planti narapela ol binantang bilong sik sapos i stap.**



**PIH Tok Tenkyu!**  
Tenkyu tru olgeta manmeri husat i wokabaut long Globeathon! Laikim Facebook page "PNG Globeathon", lukim ol poto na sapotim globeathon 2015!!

**Tenkyu long Lae Bisket na Supreme Industries long sponsa long brekfas long ol lain i wokabaut!!**



Pacific Internation Hospital:  
4-mile ( Boroko bus stop) - 323 4400, Specialty Clinic (3-mile) 311 3000 and Vision City - 310 0485 Website: www.pih.com.pg  
Text line (for SMS inquiries ONLY) - 7155 8866

# Gavman bai putim loa bilong banisim intanet

## Nesenel gavman stap baksait long Ramu NiCo Projek

### Stanley Nondol i raitim

NESENEL Eksekutiv Kaunsil (NEC) i tok orait pinis long gavman bai stretim sampela loa bilong banisim ol pipel long no ken yusim ol samting i no gutpela long intanet.

NEC i tok orait long Cybercrime ( ol samting i no gutpela long intanet) polisi. Dispela i nau opim rot bilong Task Fos bai wok na kamapim loa bilong banisim gut rot bilong yusim intanet long kantri.

Gagman i mekim dispela muv bihain long planti komplek i kamap olsem tenkoloji o save bilong kompyuta i kama long wol, na planti ol yangpela na lapun i yusim intanet long mobail pon na long kompyuta na i go long oleria we i bagarapim tingting bilong ol.

Minista bilong Infomesen na Komyunikesen, Jimmy Mirringtoro, i tokaut olsem NEC i givim tok orait long K1.32 milien long mekim pablik awenes o toksave long dispela loa bai dipatmen bilong em i kamapim.

Dispela pablik awenes Tas Fos bai mekim em long trenim ol kot jas, kot opisal, na ol polis man na meri long ol rot loa bai banisim intanet long kantri, na long kamapim loa bilong Cybercrime.

Mista Mirringtoro i tok dispela polisi bai helpim kantri long redi long lukluk na karim aut long loa bilong Cybercrime.

Em i tok aninit long polisi na loa gavman i lukluk long:

-Banisim PNG komyuniti long cybercrime;

-Lukautim kalsa na pasin tumbuna;

-Kamapim sef na gutpela ples bilong olgeta sitisen long yusim intanet o kamapim sef cyberen-vairomen;

- PNG loa bilong cybercrime bai wok gut wantaim cybercrime lo bilong ol arapela kantri o internesenel lo bilong cybercrime;

-Promotim na mekim gut wok bilong daunim pasin doti kamap long cybercrime loa; na

- Strongim ol lo bilong kantri long mekim wok bilong cybercrime lo na strongim sekyuriti bilong cybercrime.

Mista Mirringtoro i tok Intajensi Tas Fos bai developim cybercrime lo bilong em yet na kamapim rivyu bilong 19-pela lo stap pinis long 1951 i kam long 2012

Em i tok sampela samting gavman i tingting long long

NESENEL gavman i sanap strong yet long sapotim Ramu NiCo Projek na i laik lukim tupela distrik we Projek i stap long en em, Usino-Bundi na Raikos na tu Madang provins i kisim helpim yet i kam long dispela wanpela nikel-kobalt projek tasol long provins.

Long soim sapot bilong en, nesenel gavman aninit long Ramu NiCo Projek memorandum ov agrimen (MOA) stat long 2011 i kam 2014 i givim K13 milien long ol infrastraksa develomen insait long dispela tupela distrik na provins.

Carter Oiee em Ramu Projek Kodineta wantaim Mineral Risoses Atoriti (MRA) i tokaut long dispela las wiken long wanpela bikpela miting wantaim Ekting Minista bilong Maining, Wera Mori, projek divelopa Ramu NiCo, siaman bilong 4-pela lenona asosesin (LOA), Madang Provinsal Gavman, Leba na Industrial Rilesens na ol arapela stekholda long Madang.

Dispela miting i kamap bihain long sampela toktok i no stret em Memba bilong Usino-Bundi, Anton Yagama i mekim.

Long toktok bilong Mista

Yagama, em i tok olsem Nesenel Gavman na Ramu NiCo i no kamapim ol wok aninit long agrimen, na dispela i kamapim hevi long KBK Main long Ogas 4. Mista Yagama i no bin stap long dispela miting las wiken.

nesenel gavman i bihainim ol komitmen bilong en na bringim kamap namba wan hap wok long stretim Raikos Haiskul wantaim mani-mak olsem K1.1 milien. Namba tu hap bilong wok long stretim Raikos Hai Skul i lukim Nesenel Gavman i givim K1.26 milien, na wok ya i pinis long mun Ogas long dispela yia.



Bikpela wok mentenens long Raikos Hai skul we nesenel gavman i givim moa long K2 milien long stretim aninit long tupela hap wok.

# STIHL®

## MOROBE SHOW 2014

### SUPER SPECIALS IS ON AGAIN

**FOR ONLY**  
**K 8,330**  
**Tax Incl.**

For every purchase of a **STIHL® MS720 Chainsaw**

You walk away with **2x Alaskan Mills** and a **MS180 Chainsaw**, a **Granberg Polo Shirt** and **STIHL Cap**.



Even more gifts for purchases of any other **STIHL** products during the show period..



**A onetime opportunity you must never miss out**

**Please Hurry while stock lasts**

**Terms & Conditions Apply**

**Promotion duration:**  
**1st - 31st October, 2014**

\* Also 3 Team Milling Race is on again. To participate one must purchase a promo kit to qualify. First come first serve. Even more the Canoe Carving is on again. Come and see for yourself at the UMW stall.



**Call: Pom: 325 5766 Lae: 472 2444 Kokopo: 982 9799**



# Sen Charles Lwanga sios tok gutbai long Theresia

## ...Gutpela bos, pren na mama

**Veronica Hatutasi i raitim**

**SEN Charles Lwanga Peris long Gerehu, Nesenel Kapitell Distrik long dispela wik i bin tok gutbai long wanpela gutpela perisina wantaim funerel sevis long aste apinun.**

Sampela perisina, ol famili memba, wantok, ol gutpela pren, ol wanwok na ol niuslain i bin tok gutbai long Theresia Kumo husat i bin lusim laip bilong em long las wik.

Theresia i wanpela niusmeri na em i holim bikpela wok olsem Dairekta bilong Midia Yunit bilong Praim Ministas Dipatmen.

Theresia bilong Simbu Provins tasol em i bin groap long Goroka, Isten Hailans we famili bilong em i stap long en na kolim ples. Em i bin gat 38 krismas taim em i dai.

Theresia i lusim tripela liklik pikinini we ol famili bilong em nau bai lukautim.

Em i bin pinisim skul jenelis long Divain Wod Yunivesiti (DWU) na wok wantaim Post Courier niuspepa na ol arapela hap moa bipo em i joinim midia long Palamen long yia 2004.

Long yia 2011, ol i promotim em i go kamap Midia Dairekta inap em i dai long las wik, bihain long em i bin sik long

sampela mun.

Ol lain i mekim toktok i tok Theresia em i wanpela strongpela yangpela meri bilong hatwok na mekim gut wok. Em i gat gutpela pren pasin na laikim ol narapela na i wanpela gutpela mama.

Theresia i wanpela yangpela meri i holim dispela bikpela wok long opis bilong praim minista we pastaim, ol man tasol i save holim.

Tasol wantaim bikpela save na ekspiriens, Theresia i mekim gut wok na go pas long ol man na meri long Midia Yunit bilong Praim Ministas long givim ol nius long wok bilong Praim Minista, Dipatmen, Nesenel Eksekutiv Kaunsel na Palamen i go aut long ol arapela midia long kantri. Na ol midia i save autim long redio, TV na niuspepa i go aut long pablik long PNG.

Taim Praim Minista i go long ol ovasis kantri na ol narapela hap bilong PNG, Theresia i save go wantaim long kisim ol nius na poto na salim i kam bek long PNG o Mosbi.

Ol wanwok na ol lain long PM Midia Yunit i sori no gut tru long lusim yangpela savemeri na gutpela bos na poroman olsem Theresia.

Mi wanpela long ol nius ripota na pren husat i bin gat

sans long go wantaim Theresia long wanpela wik raun i go long Bogenvil long mun Januери long dispela yia.

Mipela i raun paspas na mekim wok gut tru long Buka, Arawa, Buin na Panguna na mi lukim olsem wok bilong Theresia i no bilong 8 kilok inap long 4.06pm, no gat.

Em i stap sambai de na nait bikos wanem taim wok i kamap, ol bai singautim em.

Stap na situesen long Bogenvil i no isipela samting bikos long pait na gavman na ol lida long Bogenvil na PNG i mas was gut tru na skelim gut ol toktok, wokabaut bipo ol i mekim wanpela disisen.

Olsem na long biknait Fonde nait mipela i stap long Arawa, Theresia i kisim wanpela fon kol long go long wanpela miting we Minista Ben Micah na ol arapela bikman bilong nesenel gavman i mas bung wantaim ol Panguna lida.

Samting olsem 1.00 kilok bikmoning, Theresia i go na stap long tupela awa samting. i no long taim mipela i kirap na hariap mipela i ron long kar i go antap long Panguna.

Long dispela taim, Theresia i strong na helti, na strong long mekim wok. Wantaim ol narapela nius ripota bilong ol redio, TV na ol niuspepa long Mosbi

na Bogenvil, mipela i raun long "life on the fast lane", long san, ren na taitwara long Bogenvil we ol wara i no isi.

Theresia em meri bilong mekim pani, toktok gut na soim gutpela pasin long olgeta lain. Na em i gutpela lida meri, gutpela pren na yangpela meri i bin gat gutpela bihain taim wantaim bikpela save na lidasip long level i stap antap i no gat planti meri i holim.

Em i wanpela gutpela piksa bilong ol meri PNG i lukluk long en na bihainim.

Long lotu sait, Theresia em i wanpela meri bilong lotu na em i save lotu long Sen Charles Lwanga, sem sios mi save go long en.

Mama bilong em tu i bin presiden bilong ol Katolik Mama long Hailans rijon long sampela yia i go pinis.

Lewa bilong planti ol meri ripota na ol man tu husat i bin kamap long funerel sevis bilong Theresia i bin bruk long lukim yangpela wanwok bilong ol i bihainim siungaut bilong Bikpela na go.

Ol i sori tru long tripela liklik pikinini we Theresia i lusim bihain.

Gutbai Theresia, bai mipela i misim o painim yu long wok raun olsem ol nius manmeri long Mosbi na kantri.



## Ol Kristen Sios long PNG i pundaun long mani

**L**ONG olgeta niuspepa na EMTV, ol memba i wok long givim aut mi-lien na tausen kina i go long ol sios.

Ol visit o wokabaut praim minista na ol memba i save mekim long wanwan provins, distrik, taun, siti na ol liklik ples ol i wok long givim lep rait long mani i go long ol sios i stat long ol liklik sios i go inap long ol mama sios.

Sampela ol dispela sio i no gat sosel sevis wok olsem, skul, helt, na ol arapela sevis, tasol ol i wok long poketim ol bikpela mani.

Sapos ol memba i gat gutpela tingting, ol inap givim mani i go long het opis na ol biklain long sios inap skelim na lukluk long ol wok we sios inap givim sevis i go long ol pipel na ol wok man bilong God, tasol nogat! Dispela kain ol wok i popaia pinis.

Tru, sapos yumi glasim gut tru, ol sios bilong PNG i popaia pinis long God na nau ol i wok long bihainim mani tasol.

Ol pasto i lus long strongim tingting pinis long wok God i singautim na odeinim ol long mekim.

Na ol pipel tu i les long givim wan ten na nau ol i bihainim ol memba olsem wanpela dok i dai na blu lang i smelim na pulim lain.

Dispela ol kain lain yumi ken tok, ol dai hat lain bilong mani na i no dai hat long God.

Wanpela gutpela piksa em yumi ken lukim wanpela mama sios (Luteran) long Lae Morobe.

Ol memba bilong ol i putim sol na suga gut tru long ol bilip manmeri na ol wokman, na bagarapim gut tru bilip bilong sista sios bilong yumi.

Em nau, i no lotu Luteran, Katolik, o Yunitet o Angliken sios tasol i mekim, nogat. Olgeta sios nau i bihainim Mista Mani na popaia pinis long wok tru God i singaut yumi long mekim.

Bikos long mani, dispela 4 fol ministri yumi kisim long Jisas taim yumi oden i popaia pinis. (Call, follow, Commission, given authority and being send to serve the people). Long pat bilong yumi pipel em wan tenth yumi kisim long potnait em bilong God i no bilong laki, bia o narapela samting.

Dispela em i no asua bilong yumi pipel, no gat. Em asua bilong ol memba bilong yumi na ol i lidim wok bilong God i go long rong hap.

Tru, tumas mi bin stap longpela taim liklik hia long kapitell siti na mi save gut tru wanem praim minista na ol memba i save mekim lep rait mani i go long ol sios.

Na dispela i givim bikpela les long yumi ol sios wokman long mekim wok na givim les long ol pipel long givim wan tenth long wok bilong God.

Em bai olsem wanem long tumora sios, na bilip bilong ol manmeri, na ol wokman bilong God.



**1- KAMAP LONG SIOS:** Ol i karim bodi i go insait long sios.

**2- BLESIM:** Pater i blesim kasket o kofin wantaim bodi.

**3- GUTBAI BOSMERI:** Niusmeri na namba tu bilong Theresia em Matrom John i putim rit o plawa long tok gutbai long gutpela bos na pren.

**4- LOTUTAIM:** Ol famili, pren, wantok na wanwok long taim bilong lotu.

**5- WANWOK:** Ol wanwok olsem ol bikman ya, Chris Hawkins em midia man bilong praim minista lukim bodi na tok gutbai long las taim.

**Ol Poto: Nicky Bernard**



Ol papagraun long Wes Nu Briten Provins i protes egensim SABL. *Poto ABC*

### **PNG gavman i no gat bikpela tingting long lukautim ples**

Dairekta bilong dispela NGO grup, Partners With Melanesians, Ken Mondiai i sutim strongpela tok-tok long PNG gavman na ol ejensi bilong en i putim strongpela tingting long konsevesen wok long kantri.

Em i autim dispela toktok bihain long Radio Australia i askim em long lukluk bilong en long sait long konsevesen wok long Papua New Guinea.

Wanpela bikpela wari em i bin autim nau em i dispela SABL o Special Agriculture Business Leases we gavman i kirapim bilong ol foren investa i go wokim bisnis long graun bilong ol asples long kantri.

Bilong yumi i save gut long bikpela long hap graun bilong PNG we ol pipel bai lusim long 99 yia aninit long dispela SABL or Special Agriculture Business Leases.

Dispela 5.2 milien hekta o 52 tausen skwea kilomita i go aninit long SABL long PNG, i moa long olgeta hap graun taim yumi putim wantaim Fiji na Solomon Ailan.

Maski wanwan len eria bilong Solomon Ailan na Fiji i namba tu na tri long Pasifik, graun bilong tupela wantaim i no kamap long mak bilong graun we ol tredisenel papagraun long PNG i givim i go long ol foren investa aninit long SABL.

Dispela em i traipela hap graun tru.

Mista Mondiai na ol NGO na ol man save long sait long enviromen na konsevesen i wok long wari tru long sait long ol senis we i go het nau long ples blong yumi.

Olgeta de na olgeta taim, ol i lukluk long ol ailan bilong yumi long ol bus, solwara, ol wara na ea na ol i save wari tumas long bihain taim bilong ol pipel bilong yumi.

Ol i lukim bikpela hevi bai kamap long bihain taim sapos gavman na yumi olgeta i no wokim wanpela samting nau long balensim sait long developmen na konsevesen.

Long dispela nau, Mista Mondiai i tok ol NGO i wok long singautim PNG gavman long makim sampela hap bus long PNG olsem konsevesen eria.

### **Solomon Islands Peace Vigil i harim ol wari**

Long International Day of Peace we i bin kamap long Septemba 21, tripela ogenaisesen i bin wokim wanpela gutpelal Peace Vigil long ailan bilong Guadalcanal long Solomon Ailan.

Program Dairekta bilong Vois bilong Mere, Lisa Horiwapu i ol tripela ogenaisesen em long Winds of Change, International Women's Federation for Peace na Vois bilong Mere.

Ms Horiwapu i tok dispela vigil o bung em ol i holim long ples Navola long Not Guadalcanal.

Em i tok planti long ol meri i bin toktok na i autim wari bilong ol long planti isu long komyniti.

Tupela long ol em i posin long telings o pipia Dam bilong Gold Ridge Main na narapela em

Giant Afrikan Snail.

### **Sik misels long Solomon Ailan i go antap**

Namba bilong pipol long Solomon Ailan husat i bin kisim sik misels nau i go moa long 2,000 na moa long tripela i dai pinis long en.

Opresen Menesa long Ministri bilong Helt Imejensi Senta, Alison Sio, i tok planti long ol pipel i kisim sik ol i bilong Honiara na Guadalcanal.

Tasol em i tok misels i kamap tu long ol arapela provins long kantri.

Em i tok ol i surikim dispela wok banis sut bilong sik misels long PNG o Nila long Solomon Ailan nau i muv i go long ol provins long kantri.

Ms Sio i tok long dispela wik, ol i kisim tu 200,000 long ol banis sut marasin bilong stopim dispela sik.

Em i tok dispela bai ol i salim i go long ol provins i ken yusim.

### **Polisi bilong ol bikpela pawa long teroris nau bai givim hevi long Pasifik**

WANPELA man save long Pasifik i tok em ino nid long ol gavman long Pasifik Ailan long pret tumas long sait long Islamic State teroris, na i go het kamapim ol kainkain nupela loa.

Dokta Tarcisius Tara Kabutaulaka, Asosieta profesa long School of Pacific na Asian Studies Yunivesiti bilong Hawai'i i tok em i no ting ol IS bai makim ol Pasifik kantri.

Dokta Kabutaulaka i tok i gat ol sistem i stap pinis long ol intanesenel arenjmen long ol kantri long rijon i ken bihainim long sait bilong lukautim boda bilong ol.

Em i tok hevi long teroris long ol Pasifik kantri nap kam long rot we Australia na ol arapela pawa long rijon i kamapim ol nupela stretijik polisi.

Dokta Kabutaulaka i tok ol dispela polisi ol i no bilong lukautim ol Pasifik Island kantri, ol i bilong lukautim ol dispela bikpela pawa long rijon yet

### **Rijon i mas sapatim Fiji bihain long ileksen**

WANPELA man save long Pasifik i tok maski yumi laikim o nogat, Fiji nau i gat wanpela nipela gavman na ol bikpela pawa long rijon i mas helpim.

Dokta Tara Kabutaulaka i tok bikpela win bilong Frank Bainimarama na Fiji First Party bilong en i soim laik bilong ol pipel bilong Fiji.

Em i tok Australia na Nu Silan i mas akseptim laik bilong ol pipel bilong Fiji bihainim dispela demokretik ileksen.

Dokta Kabutaulaka i tok ol kantri long rijon tu i mas akseptim bek Fiji long Pasifik Ailans Forum na tu, long ol intanesenel bodi olsem Komonwel.

Dokta Kabutaulaka i tok rijon i mas helpim Fiji long kamapim ol gutpela samting long sait bilong demokresi olsem fri midia na fridom long ol pipel i ken tokaut.

# Ol Poto nabaut



Ol lida bilong Luteran Sios Kainantu Distrik i redi long go long bikpela bung. *Poto: Paulus Tali*



**REDI LONG SALENS:** Nesenel Maining na Imejensi Reskyu Salens i bin kamap las wik long Utu Sekonderi skul long Kavieng, Nu Ailan Provins long las wikem we i bin lukim 10-pela tim olsem Morobe Mining Joint Venture, Lihir Tim 1 na Tim 2, Ramu Nico (Rifaineri), Ramu Nico (Main), Barrick Pogera, Simberi na Oil Search i stap insait. As tingting long dispela salens em long givim ol Imejensi Rispons tim bilog ol wan wan maining, oil na petroleum kampani sans long skelim na strongim save na wok bilong ol. Hia yumi lukim ol Ok Tedi ERT memba, Pius Letenge (lef long fran na Claude George (rait long fran) ana narapela tupela i wok long redi na wokim paia reskyu trening opresen long OTML Fire Rescue trening graun long Tabubil. *Poto: OTML Midia*



Claude George (long fran) na poro i putim aut paia long trening taim bilong ol long OTML Fire Rescue trening graun long Tabubil. *Poto: OTML Midia*

# Stopim pasin bilong paait namel long ol skul

Planti senis i wok long kamap hariap hariap na planti pikinini long taun i wok long paul nabaut. Klostu olgeta wik i save gat stori bilong ol skul pikinini i paait namel long ol yet o paait wantaim ol pikinini long narapela skul. Dispela birua pasin i stat long taim ol pikinini i stap yet long skul.

Sapos yumi no wokim wanpela samting nau long rausim dispela pasin nogut, bai sindaun bilong ol dispela yangpela manmeri i bagarap long bihain taim. Na ol narapela skul pikinini husat i wok long lukim dispela pasin nau bai ting olsem paait namel long ol skul em i nomal.

Dispela hevi bilong paait namel long ol skul i kamap bikpela tru long Mosbi na Lae. Long las tupela yia long Lae, tripela yangpela studen i dai long dispela hevi. Ol arapela provins tu i save bungim dispela hevi.

Ol papamama na skul bod i laik pinisim dispela hevi tasol i luk olsem rot bilong pinisim dispela hevi bai i no inap kamap hariap. Sampela lain i sutim tok i go long skul yet i no hariap long luksave na stapim ol dispela hevi.

Sampela i sutim tok long ol papamama i no givim gutpela skul na stia long laip bilong pikinini olsem na ol pikinini i kamapim bikhet pasin. Sampela i sutim tok long ol kalt grup long skul i paulim tingting bilong ol



pikinini.

I gat planti as bilong tok. Na i gutpela long glasim olgeta pasitaim, toktok wantaim ol skul pikinini na ol savelain husat i gat

eksperiens long stretim dispela kain hevi, na ating bai rot i klia long stretim dispela hevi. Edukesen dipatmen i luksave olsem dispela hevi i bagarapim ol stu-

den, na ol tu i mekim wok painimaut long rot bilong stapim dispela hevi. Ol polis i tok save tu olsem skul yet wantaim papamama i mas kontrolim ol pikinini na no ken singautim polis long traim stretim dispela hevi.

Dispela ol hevi i kamapim planti nupela salens long pasin bilong stopim hevi namel long ol skul. Pilai spot em i wanpela gutpela program bilong kirapim tingting bilong ol pikinini long skul kompetisen.

Bipo dispela program bilong skul kompetisen i strong tru na i wanpela gutpela rot bilong ol skul i soim save bilong ol long pilai, na i kamapim planti gutpela spot

manmeri. I bin gat tisa trening bilong ol spot tisa tasol ating dispela program i dai pinis. Olsem na tude ol tisa na komyuniti yet i

ken helpim long ranim dispela program.

I gat ol narapela gutpela kompetisen olsem skul dibet bilong salensim save bilong ol studen na givim ol strong long sanap long ai bilong pablik na toktok. Pasin bilong pablik dibet bai kamapim ol gutpela lida.

Narapela rot bilong helpim ol skul pikinini em long kirapim tingting bilong ol long joinim ol skaut na gel gaid grup.

Bipo i bin gat ol dispela grup i strong long wan wan provins. Ating nau em i taim bilong kirapim ol gen na pulim ol skul pikinini i go insait.

Bikpela salens i stap long bilip bilong yumi ol pipel. PNG i wanpela Kristen kantri. I mas gat ol katekis o relijis instraksen (RI) tisa bilong ol lotu i go long ol skul. Sampela skul i gat taim bilong RI tasol planti i no bisi tumas.

Tude ol skul i pulap tru bikos long fri edukesen. Ol klasrum i pulap na tisa i no inap skulim gut ol studen o i no gat taim long luksave long wari bilong ol studen.

Ating ol tisa koles i mas gat moa trening long saikoloji bilong ol pikinini na pasin bilong luksave long hevi na wari bilong ol.

Laip bilong ol pikinini long taun tude i no wankain olsem laip bilong ol papamama o tumbuna bilong ol bipo.

Yumi mas luksave long dispela na kamapim gutpela senis long stiaim laip bilong ol skul pikinini na stopim ol long bikhet pasin bilong ol paait namel long ol skul.

## O'Neill na Namah sutim pinga go kam

PRAIM Minista Peter O'Neill i laikim Ombudsmen Komisnin mas sekim lida bilong Oposisen, Belden Namah, long we em kisim K50 milien na sapotim ol kendidet bilong em long 2012 nesenel ileksen.

Tasol Oposisen lida, Belden Namah, i tok Praim Minista no ken yusim opis bilong em long pusim wok bilong Ombudsmen Komisnin.

Praim Minista i tok bikos em bin raitim pas pinis long Ombudsmen Komisnin, Komisnin i mas kamapim dispela wok painimaut. Em i skelim olsem Ombudsmen Komisnin i no laik mekim dispela wok long sekim Belden Namah wantaim dispela K50 milien em i bin tok long en.

Yumi ken lukim olsem tupela lida ya i gat birua na bikpela salens namel long tupela yet. Narapela wok long painim wanem kain spes o rot i stap long traim daunim narapela long wok na posisen bilong em.

Dispela bin stat long taim bilong wanpela kot sas long praim minista we ol polis man bin kamapim. Dispela i bihainim ol toktok Mista



Namah bin mekim long Palamen, na bihain Tas Fos Swip tim bin mekim wok painimaut na givim go long polis long holim na sasim praim minista.

Dispela salens namel long tupela lida ya i stat long dispela taim i kam na bihain sait bilong gavman i wok long pulim planti memba bilong Oposisen go long hap sait na sotim tru namba na strong bilong Oposisen. Mista Namah i tok praim minista i wok long yusim Distrik mani bilong ol elektoret long grisim na pulim ol memba i go pulap long sait bilong gavman.

Dispela i bin mekim Mista Namah i tokaut olsem em i bin yusim K50 milien bilong em yet long helpim ol dispela memba long ileksen kempen taim. Nau ol no gat rispek na kirap lusim em tasol em no kros tumas bikos em bilip praim minista yusim distrik mani long pulim ol memba i go long em.

Mista Namah i tok em bin bisnisman bipo long em kamap memba na em gat mani long dispela taim long helpim ol kendidet bilong em long pati long ileksen kempen bilong ol long 2012. Em tok sapos Ombudsmen Komisnin laik kwestenim em long dispela bai em tokaut stret. Olsem na em tok Praim Minista no ken yusim sia bilong em long pusim Ombudsmen long wok bilong ol.

Em salens bilong Mista O'Neill na Mista Namah long dispela taim.

Praim minista yet i gat nem pinis long wanem taim bai em sanap long kot bilong Lidasiip Traibunel long sampela rekot long mani bilong elektoret na long ol wok em i mekim wantaim mani bilong elektoret.

Dispela em Ombudsmen Komisnin bin mekim wok painimaut na lukim olsem i gat sampela asua long ol rekot olsem na ol givim go long han bilong Pablik Prosekyuta long sekim gut na askim Sief Jas bilong Nesenel Kot long kamapim dispela kot long Lidasiip Traibunel.

Em i wankain kot olsem olpela memba bilong Pomio Paul Tiensten bin sanap long en na kot sasim em go long 9-pela krismas kalabus long las yia.

Sampela memba bilong bipo taim kot bilong Lidasiip Traibunel laik kisim ol bai hariap tru ol risain long wok bilong ol olsem memba bilong palamen na kamap man nating we ol no inap kot moa inap tripela krismas.

Belden Namah i bin sutim tok tu olsem Peter O'Neill bin yusim ol mani bilong kantri we i no stap long baset long sapotim ol kempen bilong ol memba bilong em long 2012 nesenel ileksen. Tasol Mista O'Neill tok em ol giaman toktok we i no gat as na trupela long en.

Sutim tok i go kam long narapela narapela em wanpela piksa yumi wok long lukim tude long ol lida bilong yumi long gavman.

Maski tok i gat tru o rekot long en em ol bai tromoi tasol long pablik i harim na lukim na skelim long ol yet. Sapos tok i go long kot em kot bai skelim na mekimsave.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: [editorial@wantok.com.pg](mailto:editorial@wantok.com.pg)

Pe bilong wanpela yia

Websait: [www.wantokniuspepa.com](http://www.wantokniuspepa.com)

Pe bilong wanpela yia, 52 niuspepa

PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga  
Editor Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

# PIH Globeathon: kensa wokabaut



Poto1: plawa bilong olges spika.

Poto 2: Mama na pikinini redi long wokabaut.

Poto 3. Go aninit long 4-Mail ova het bris.

Poto 4. Ol wok lain long PIH.

Poto 5. PIH redim bena long wokabaut.



# Misels i stap long AOG konvensen kem

Frieda Sila Kana i raitim

**NESENEL Kepital Distrik helt sevis i bin stap long 5-pela de bilong Asembli ov God Nesenel Wimen Konvensen long Jubili AOG Koles long Rainbow, Mosbi Not Wes long dispela wik.**

Ol nes i tok ol i painim olsem i gat 4-pela kes bilong misels pinis olsem na ol i singaut long ol misels sut marasin long kam na givim banis sut long ol mama.

Tupela Distrik Medikol Opisa em Dokta Kidu na Dokta Sauk tu i givim taim bilong ol long sekim ol sik na ol lain i gat sampela kain hevi. Na i bin gat dentis dokta bilong tit tu i sambai long helpim.

Dispela ol helt lain i bin givim

taim bilong ol long stap olsem imejensi tasol i luk olsem ol mama i kam long ol wantaim ol sik. Ol lain i gat misels em wanpela bilong is Sepik, wanpela bilong Maun Hagen, wanpela bilong Jiwaka na wanpela bilong Enga.

Ol helt woklain i ting olsem binatang i stap long bodi bilong ol na taim ol i kamap long hotpela ples, ating em i kamap ples klia.

“Mipela i mas putim banis tasol long dispela sik misels i no ken go ausait long banis long hia,” wanpela nes opisa i tok.

**Ol NCD Helt Nes Opisa sekim ol mama long AOG konvensen.**



## Asembli ov God meri bung kisim K200,000

Frieda Sila Kana i raitim

“KAA tomota, Yesu Uarono, Kai tomota. Yesu pande pakeleman mena. Netora moadoma nakenene. ibini Imanuel wa yoka ye,” em ol toktok bilong song ol meri AOG bilong Pangia distrik i singim long Praim Minista long las wik Fraide 26 Septemba long Mosbi taim ol i go bungim em long haus Palamen.

“Yesu em i no wanpela ‘basta’ pikinini. Em i pikinini bilong man olsem na yupela opim bel bilong bilum gut na putim em i go insait na karim i go,” dispela em i mining bilong namba wan lain bilong dispela singsing we ol i bin singim long tokples Pangia.

Pasto Mark Walea bilong Kingdom Laip Embesi Asembli ov God sios long Mosbi i bin stori long dispela singsing taim ol meri i singsing na danis na swingim bilum long fran bilong ol ausait long haus Palamen.

Pasto Walea i tok, “Em i no wanpela samting sapos praim minista i kam lukim ol mama ausait long Palamen o no gat. Tasol yumi mas ai op long lukim we God i laik go nau na yumi mas redi long wok wantaim em insait long nesen bilong yumi.

Olgeta samting long ikonmik, sios na ol arapela developmen nau i wok long senis na yumi mas redi long ran wantaim God.”

Biklain meri, namba klostu winim 4,000, husat i kamap long wan wik konvensen bilong ol AOG mama long Mosbi i bin mekim wanpela ‘Jisas mas’ stat long Jack Pidik Pak long 5-Mail na i go bihainim Sir Hubert Mari Haiwe i go bihainim Waigani Draiv na i go long Palamen.

Olgeta mama i putim retpela klos long makim olsem blut bilong Jisas i pinisim olgeta wok pinis na Papua Niugini mas redi long kisim ol kaikai bilong hatwok bilong ol long graun bilong ol yet.

Ol meri i bin gat bikpela amamas na tenkyu long God i mekim samting i kamap, taim Praim Minista i lusim wok bilong en na i kam long bungim ol ausait long haus palamen. Toksave i bin kisim em leit na

ol i ting bai Minista bilong Sios, Meri, Yut na Komyuniti Dvelopmen, Mis Delilah Gore tasol bai kam bungim ol tasol ol i kirap no gut long harim olsem Praim Minista i redi long bungim ol.

Ol lida bilong ol meri na ol pasto i singaut long ol meri long Pangia, ples bilong Mista O’Neill long kam na singim wanpela song long tokples stret bai i ken kisim ia bilong em.

Reveren Pandu, Nesenel Presiden bilong AOG i tok, “Meri painim hevi long helt, edukesen na rot bilong mekim mani tasol Mista Praim Minista ol polisi bilong gavman bilong yu i helpim ol nau long fri edukesen na fri helt olsem na ol meri inap long baim balus na kam long Mosbi.

“AOG i gat bikpela amamas long bung wantaim yu bikos namba wan sios kongrigesen bilong AOG i bin stat long ples bilong yu long Moreo long Pangia na bihain em i go long narapela hap bilong Hailans.

Ol meri Pangia i karim bel we yu kamap long en, olsem na ol i laik kam tok tenkyu long yu na pre long yu.”

Praim Minista Peter O’Neill, i givim K200,000 long ol meri AOG, wankain olsem em i bin mekim long ol meri bung bilong ol Luteran long las mun long Boana, Morobe Provins. Minista bilong Komyuniti Dvelopmen, Yut, Meri na Sios i givim wanpela K10,000 long ol.

Reveren Mariana Maru, Presiden bilong AOG meri i tok tenkyu long praim minista olsem, “Polisi bilong yu long fri edukesen na fri helt na gutpela infrastraska long ikonmik developmen i mekim na planti mama i nap long kalap long balus na kam long Mosbi long stap long dispela namba 8 Nesenel Wimen Konvensen. Mipela putim ret klos long singautim blut bilong Jisas long karamapim dispela kantri.”

Mista O’Neill i tok em i bin gat planti miting na wok long mekim na dispela toksave i kam bihain tru tasol em i bin surukim ol miting i go na em i kamap long bungim ol mama.



Lida meri tok tenkyu long ol lida bilong palamen haus taim ol i kam bung long palamen haus las wik. Poto: Nicky Bernard



Praim Minista Peter O’Neill to gutbai long ol meri taim ol meri kam bung long palamen haus. Poto: Nicky Bernard



Rot i pas taim 4000 mama bilong olgeta hap bilong provins i wokabout long Pot Mosbi siti las wik. Poto: Frieda Sila Kana



Program bilong Wanwan De

De - Mande - Fraide

6am - 10am - Sankamap show - Host: Kas.T
6:00am - Major Nius Bulletin
6:15am - Komuniti Notis Bod
6:25am - Taim Bifo - wanpela singsing b'long bifo.

Tasol
9:30am - Final aua cruz
10am - 3pm - Morin Trek na Belo Pack
10:00am - Major Nius Bulletin - YUMIFM Nius Senta

2:00pm - Major Nius Bulletin - YUMIFM Nius
2:05pm - YU TOK - komiuniti awenes program
2:45pm - YUMI PANIM WOK Segment
3pm - 7pm - Avinun Draiv Taim - Host: Vaviessie

6:10pm - 7:00pm Mon kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
7:00pm - Nius - YUMIFM Nius Senta

Sarere belo cruz - Host: Tuluvan Vitz
1pm - 2pm - Sarere Belo Taim Dedikesen
2:00pm - Nius - YUMIFM Nius Senta

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TUNDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

TRINDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FONDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

FRAIDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius

Raun wantaim Wantok kru ...

Kapul bilong Harim tok

Nicky Bernard i raitim

Atsi em i wanpela kapul ol sampela famili long Renbo long Gerehu i bin lukautim em taim em i bebi o em i liklik stret.

Taim mama bilong em i bin karim em na raun long bus, sampela ol ples lain bilong Rigo long Sentral Provins bin holim mama bilong Atsi na kisim em kam long taun. Na dispela famili bin kisim Atsi na lukautim em.

Atsi nau em i bikipela kapul pinis. Em i save harim tok bilong ol famili bilong em long Renbo. Taim em i raun long wanem hap liklik diwai long banis bilong ol na ol kolim nem bilong em, hariap tru em bai lusim wanem hap em i stap long em na go long haus.

Planti pikinini long Renbo i save laikim Atsi stret. Taim ol famili bilong em i kisim em na raun long rot, ol pikinini bai kolim nem bilong em na ran go holim skin bilong em, toktok long em na bihain ol bai lusim em.

Atsi em man bilong kaikaim kainkain kaikai, em pilim i gutpela long em bai em kaikai tasol na dispela mekim em bikipela kapul stret.

Tasol fevered bilong en, em snax bisket. Taim yu givim snax bisket bai yu no inap lukim wanpela pipia bilong snax bisket long graun o plua bilong haus. Em bai klinim gut tru taim dispela peket

bisket i pinis.

Atsi i save pulim ai bilong ol manmeri taim em raun long Renbo market long wanem ol i save long nem bilong em. Skin kala na grass bilong em i stail stret oisem na ol-geta lain i save putim ai long em.

Atsi tu em i bikipela boi long wanem olgeta dok long banis bilong ol i save gut long em.

Taim em i kam daun long haus na i laik go antap long diwai, ol dok poro bilong em bai lukluk long em tasol na em go antap long wanem diwai em i laik go malolo long en.

Ol famili bilong em i save lukautim em gut tru na ol i save putim bikipela was long em long wanem, em i save pulim ai bilong planti lain na tu em i no man bilong pret long ol manmeri.

Oisem na ol famili bilong em i save putim bikipela was long em, nogut sampela lain kisim em na ronawe wantaim.



EMTV Television Guide

FONDE OKTOBA 2, 2014
9:00 PM PG ELITE MUSIC ZONE #30
9:30 PM PG NRL FOOTY SHOW
4:30 AM G AUSTRALIAN NETWORK
5:00 AM G JOYCE MEYER 1098-4

9:00 PM PG ELITE MUSIC ZONE #30
9:30 PM PG NRL FOOTY SHOW
11:30 PMG NEWS REPLAY
00:00 AM Australia Network
FRAIDE OKTOBA 3, 2014
4:00 AM G AUSTRALIA NETWORK
5:00 AM G JOYCE MEYER 1098-5

day's National News, sports and weather.
6:30 AM G TODAY
09:00 amG CLASSROOM BROADCAST
3:30PMG KIDS KONA
5:30 PM G SKIPPY - "Flying Saucers"
5:55 PM G CRIME STOPPERS

Ep# 1
9:00 PM MA FRIDAY NIGHT MOVIE - EVERY WHICH WAY BUT LOOSE
10:30 PM G EMTV NEWS REPLAY
11:30 PM Australia Network
SARARE OKTOBA 4, 2014
4:30 AM G AUSTRALIA NETWORK
6:30 AM G EMTV NEWS REPLAY

5:30 PM G OLSEM WANEM EP#38
6:00 PMG EMTV NATIONAL NEWS
6:30 PM G SECRET MILLIONAIRE USA S1 Ep #1
7:30 PM G RAIT MUSIK Ep #231
8:30 PM MA MOVIE - CLARA'S HEART
10:00 PMG EMTV NEWS REPLAY
11:00 PM Australia Network
SANDE OKTOBA 5, 2014
3:30 AM G AUSTRALIA NETWORK
6:30 AM G EMTV NEWS REPLAY

TORO



BIABIA



KANAGE



KROSWOD

- Antap 1 Laikim tumas 5 Pasin bilong ol Indonesia long putim kala long laplap 10 Pis 11 Wara 12 Bihain tru 14 SUSA 17 Bilum bilong 18 Musik instramen 20 Kukim long plaua 21 Lait i 23 Mani bilong wok 24 Tudak 27 Pawa masin 30 Kaikai go insait long en 31 Kain gras 32 Long taim bilong Jisas 33 Redio 35 Namba 36 Melanesian Alaiens Pati 37 Mak bilong kompas 38 Narapela lain 39 Pilim nogut 40 Lusim ples 42 Han bilong Australia gav-man 44 Ailan long Maikronesia 46 Vinega 49 Wankain skoa long spot 50 Toksave pepa bilong baim 51 Teknikel nokaut long bok-sen 52 Solwara i kirap 53 Provins bilong ol Miok 54 Ailan long Bogenvil 55 Ples ol sumatin i kisim save Daunbilo 1 Pilai 2 Bilong sevim mausgras 3 Putim i go antap 4 Opisal buk bilong raun ovasis 5 Pren 6 Bilong lukluk 7 Televisen 8 Yau 9 Biktaun bilong Morobe 13 Salim mani kwik long pos opis 15 Namba 16 Mande em wanpela 19 Hait na lusim ples 20 Ples long Isten Hailans 22 Bilong rait 23 Sampela ka gat dispela kain gia 25 Siksti minit 26 I no hatwok 27 Wara bilong prut 28 Namba 29 Namba wan man 31 Redio stesin 34 Ol rul 37 Salim toktok long mobail 40 Kontrolim spit bilong ka 41 Senia plisman 43 Ol soldia 45 Tuna 47 Hap diwai 48 Ailan long Is Sepik 50 Boil

SUDOKU

3 5 9 7 4 2 8 6 1
1 6 4 5 9 8 2 7 3
7 8 2 3 1 6 4 9 5
9 1 5 6 2 4 7 3 8
2 3 8 9 5 7 6 1 4
4 7 6 1 8 3 5 2 9
8 2 3 4 7 1 9 5 6
6 9 7 8 3 5 1 4 2
5 4 1 2 6 9 3 8 7


Ansa bilong las wik Sudoku # 63

3 2 1 9 6
4 8 9 5 4 7 2
3 1 2 6 5
1 9
9 5 6 8 2
1 8 3 7
5 3 7
7 5 4 3 2

Ansa bilong Sudoku # 64 neks isu

B U A I K U L A U
M N A M E T
B A S P I S
B E S E N A D O
R N S O L D I A
U D O P I S
S E P T E M B A P
S I O S U T I
O K E T A T O K
N I A A S T I A

Ansa bilong las wik kroswod, isu #



EMTV Television Guide

Table with columns for time slots (e.g., 7:00 AM G, 7:30 AM G), program names (e.g., HILLSONG, AUSTRALIA NETWORK), and dates (e.g., MANDE SEPTEMBER 29, 2014).

Ol Progam na Kilok i ken tenis oltaim...

# Oi Raun Nabaut Poto:

# Raun wantaim Kanage olgeta wik



**LALAI:** Trochus o lalai sel i gat gutpela mit bilong kaikai long ol Pasifik Ailan kantri na wol. Sel bilong em tu ol i save wokim ol baten long putim long ol klos long en. Ol juwelri na hankraf. Kantri Samoa nau i kamapim nupela trokas o lalai sel fiseri wantaim ol nupela kain lalai sel bihainim ol narapela ailan kantri olsem Federetet Stes bilong Maikronesia, Masal Ailan, Cook Ailan na Frens Polinesia. Samoa i bin statim wok long ol nupela lalai sel long ol yia long 1990. Poto i soim tripela yangpela man Samoa i holim ol lalai sel. **Poto: Saut Pasifik Komyuniti o SPC**



**SAPOTIM AT:** Benk Saut Pasifik (BSP) i sapatim PNG at na kalsa na olsem, em bai sponsaim Melanisen Ats na Tiata (MAT) At So bai kamap long Mosbi namel long Oktoba 17 na 19 long dispela mun yet. So i kamap long wankain taim MAT i selebretim 100 yia anivesari bilong em. **Poto: BSP Midia**



**ORO! ORO!** Naispela tumbuna bilas bilong ol Oro we dispela liklik meri i soim long PNG Indipendens de selebresen. **Poto: Buana Ragela**

## Holim strong

KANAGE em bilong Watom ailan long Is Nu Briten provins. Wanpela taim, ol bikman long ples askim Kanage long go wantaim ol long Rabaul taun. Ol kisim moto kam long ples Vunavulile na go sanap long rot wetim kar stap. Wanpela waitman draiv kam na ol stopim em. Waitman askim ol, "Where are guys going?" Narapela yangpela mangi tokim em ol laik go long Rabaul taun. Kwan, waitman tokim ol long kalap. Yangpela mangi tokim ol biklain long kalap na em yet bai sindaun long fran long wanem em save long Tok Inglis. Tasol nogat. Kanage tokim em long sindaun wantaim ol lapun long baksait. Kanage kalap long fran na ol ron go. Ol ron go abrusim Vuvu na ren pundaun. Waitman ya tokim Kanage, "Please, wind up your window." Kanage kirap singaut go long ol lain long baksait, "Ol lain, waitman tok olsem holim strong!" Ol ron go long kona bilong Nonga Haus Sik na waitman ya askim Kanage gen, "Please, wind up your window." No gat. Kanage kirap singaut gen long ol lain long baksait, "Aiya, yupela holim strong." Ol ron go na waitman ya belhat long wanem ren wasim insait bilong kar. Em singaut long Kanage, "Wind up your window now!" Tasol nogat. Longlong Kanage singaut long ol lapun long baksait, "Waitman tok kalap go ausait nau tasol." Kanage tasol mekim na olgeta lapun kalap



na kisim bagarap long ol as bilong ol banana.

**Mambu Wantok Bilong Yu Yet**

## San na mun

KANAGE wantaim poroman bilong em Orike pilai snuka long haus bilong Kanage. Sampela meri Kerema go long haus bilong Kanage long kisim wara long paip wara bilong Kanage long wanem ol nogat wara long hap bilong ol. Orike lukim ol meri Kerema wokabaut go arere long haus na em giaman na tokim Kanage, "Aiyo, perendol Bikpela kus stret pas long trausis bilong yu ya!" Kanage paul olgeta na hariap tru rausim trausis bilong em. Ol meri Kerema lukim Kanage sanap as nating na wanpela bilong ol tok, "Aiyo, san tasol bikpela mun kam aut." Kanage harim olsem na bekim, "Sapos mun i sain long ai bilong yu, yu bai tingting na pilim olsem yu stap long mun ya." Meri ya harim bekim bilong Kanage na em tok, "Ating mun ya i mas i gat strongpela lait bilong paulim tingting bilong man gen ya."

**Wopa Mote Mosbi**

## Mangi Papua

KANAGE i save stap long Mosbi. wanpela wiken, boi kalap long balus na go long Rabaul. Em i go long lukim ol bagarap maunten paia i kamapim. Balus i go kamap long Rabaul ples balus na Kanage lusim balus na go arasait. Em i lukim wanpela yangpela meri tolai sanap ausait long teminel na em i askim meri long tok inglis olsem, "Hey lady, is this Rabaul town?" Meri tolai kirap na bekim. "Em nau." Kanage paul na askim gen na meri ya i mekim wankain toktok. Kanage belhat na tokim dispela yangpela meri Tola olsem, "Oh no. it seems that she is trying to trap me. This is not Rabaul. Em i tok olsem pinis na kalap long balus na go bek long Mosbi. Samting tru i olsem Kanage i no save long tok pisin. Em i save long tok inglis tasol. Watpo? Bikos em i bilong Papua yah."

**Lapun Hookworm**

**Ol skwat!**  
Salim ol gutpela Kanage tok pilai i kam long:  
Kanage Tok Pilai  
P.O. Box 1982,  
Boroko, NCD  
Port Moresby.  
Email:  
jwilson@wantok.com.pg

# Mi wari long bebi bilong mi i no laikim mi

## Dia Laipain

MI WANPELA yangpela singel mama i gat 22 krismas. Boipren bilong mi na papa bilong liklik pikinini mangki i wok na stap long wanpela maining taun long narapela provins.

Mi save wok na stap ausait long taun taim liklik bebi bilong mi, husat nau i gat 7-pela mun nau, em mamapapa bilong mi i lukautim i stap long taun. Bebi bilong mi i dring susu botol i stap bikos em i lusim susu taim em i bin gat 4-pela mun.

Wari mi gat long en em, i luk olsem bebi bilong mi i no wari long mi nau. Long sampela wiken, mama bilong mi i save kisim bebi i kam stap wantaim mi, tasol long taim bilong go bek, em no bisi long mi. Tasol mi laikim em stret bikos em i namba wan pikinini bilong mi.

Narapela wari em, boipren husat i papa bilong bebi i no tingim mi, o raitim pas o ringim mi taim mitupela i stap longwe long wanpela narapela. Mi save wari stret taim mi tingim dispela na liklik bebi bilong mi. Long las tupela mun nau, mi no wok long kaikai o slip gut.

Mi laikim helpim.

## Worried Mother

### Dia Pren

TENKYU long raiti i kam long Laipain.



Mipela i sori long harim kain sindaun yu stap long en, na mipela i luksave long pilings na wari yu gat long liklik bebi i stap nau wantaim papamama bilong yu na em i pas wantaim ol. Na boipren na papa husat i no kontekim yu liklik. Bikos long dispela, yu wari na yu no kaikai o stap gut. Tasol mipela i amamas olsem papamama bilong yu i wok long lukautim bebi bilong yu. Tasol mipela i tokim yu olsem em wei bilong em long husat i stap olgeta taim wantaim bebi, em bai pas long em o ol.

Dispela i no min olsem bebi bilong yu i no laikim yu, nogat. I moabeta long yu serim dispela wari yu gat wantaim papamama bilong yu. Ol bebi i liklik tumas na wanem samting ol i mekim, ol i no luksave long en inap ol i groap long kamap ol bikpela pikinini.

Mipela i sori olsem boipren na papa bilong bebi i no save kontekim yu na yu stap nau wantaim wari. Yutupela i bin wokim sampela plen long

bihain taim bilong yupela taim yutupela i save poroman? Yu rait i go tu long em? Nogat em no save tu olsem yu gat bebi long em.

Mipela i strongim yu long kontekim em na painaut long posisen bilong em long yu na bebi. Na sapos em i no givim gutpela bekim, yu ken go lukim provinsel Welfea Opis. Ol bai helpim yu. Lo i stap we papa bilong pikinini i mas helpim long sait bilong mentenens inap pikinini i gat 18 krismas. Dipatmen bai helpim yu pulumapim fom long mekim papa bilong pikinini i peim mentenens long pikinini.

Ol man i ken lusim yumi tasol God i no inap. Putim bilip bilong yu long God tude, Proverb 3:5,6. God i promisim yumi olsem em bai no inap lusim yumi- Hibrui 13:5b.

God i ken stiaim yu long mekim disisen bilong yu.

## Laipain

**Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.**

## Laipain



# Puma Energy lukluk long mekim moa milien kina invesmen

**Stanley Nondol i raitim**

BIKPELA oil saplaia long kantri, Puma Energy Limited i lukluk long mekim moa invesmen long milien kina long oil bisnis long kantri long ol yia i kam.

Jenerel Menesa bilong kampani, Peter Diezmann i tok kampani i gat bikpela bilip long gro bilong PNG ikonomi, na i tok kampani bai mekim namel long K300 na K500 milien long narapela tripela yia.

Mista Diezmann i tok kampani i lukim planti sans bilong bisnis long kantri bikos ikonomi i gro gut long planti sekta olsem egrikalsa, oil na ges maining, forestri na planti moa.

Em i mekim dispela toktok bhain long kampani i tokaut long K3milien sponsa i go long 2015 Pasifik Games.

Mista Diezmann i tok kampani i amamas long helpim mani long Pasifik Gems bikos kampani i mekim bisnis long kantri na i gat wok long sapotim ol lokol komyuniti long ol wok olsem spot na ol narapela eria moa.

Puma Energy i tekova long InterOil Limited long oil bisnis long kantri wantaim moa long K400 milien invesmen.

Nau Puma i wok long senisim sain bot na ol tredmak bilong InterOil i go long Puma Energy. Em i stat long Pot Mosbi na bai mekim long olgeta sevis stesen na ol bisnis bilong em long kantri.

Mista Diezmann i bin wok long bisnis bilong InterOil moa long 13-

pela yia na i gat save long wok long kantri wantaim gavman, papagraun na i gat gutpela pren wantaim ol komyuniti.

Em i tok InterOil i gat gutpela pren wantaim komyuniti long planti yia pinis na taim Puma Energy i tekova, wankain menesmen i stap yet na pren bilong kampani wantaim gavman, papagraun na ol stekolda na komyuniti i stap strong yet.

Mista Diezmann i tok kampani i gat plen long mekim bisnis long kantri na gro bikpela.

Minista bilong Spot na Pasifik Gems, Justin Tkatchenko i tok em i gutpela long ol kampani i wok patnasip wantaim gavman long ol developmen long kantri.

Em i tok helpim bilong Puma Energy long Pasifik Gems i kam aninit long Pablik Praivet Patnasip na i makim maus bilong gavman na tok tenkyu long Puma Energy long mani sapot long Pasifik Gems.

Puma i gat moa long 40 sevis stesen long kantri na olgeta sevis stesen bai gat nupela sain bilong Puma Energy long makim tred mak bilong bisnis bilong kampani.

Mista Diezmann i tok kantri i gat bikpela oil na gas stap tasol kampani na gavman i no gat kontrol long prais bilong piul insait long kantri.

Em i tok taim kantri i salim krud oil i go long wol make, em i resis wantaim ol narapela kantri tu. Samting i kamap long wol maket.

## Indipendens Kes Promosen

**Jannelle Maniha bilong Hugo Canning raitim**

HUGO Canning Kampani i pinisim gut Independens Kes Promosen bilong en we i bin ran long Jun i go Septemba na i lukim 1500 lain i putim nem. Long dispela mak tasol 10-pela lain tasol i laki na i winim K5,000 kes prais wantaim 100 saplimentri prais wina i kisim sampela Ox Palm Red 2.72kg long selebretim independens de.

Dispela promosen i kamap long olgeta hap bilong kantri long kampani i tok tenkyu ol kastoma bi-

long en long stap gutpela klain long planti yia long mekim Ox & Palm tru buli bif bilong PNG.

Hugo Canning i laik tenkyu long olgeta lai husat i bi go insait long dispela resis na tok amamas long ol lain husat i winim prais long kes mani na ol arapela saplimentri prais.

Promosens Kodineta, Jannelle Maniha i tok, ol nem bilong ol wina bai kamap long Nesanel Niuspepa na Hugo Canning Marketing dipatmen bai toksave long ol wina long rot bilong kisim prais bilong ol.



Hugo Canning Promosen Kodineta, Jannelle Maniha pulim ol nem long bokis na wanpela polisman i witnessim.



Toktok i kam long  
**Mel Togolo**  
PNG Kantri Menesa



Welkam long namba 6 Nautilus Mineral Ripot.

Nautilus Minerals i gat strongpela pasin bilong wok klostu wantaim komyuniti na em i amamas long CARES program bilong em. Mipela sanap strong long wok bung wantaim ol stekholda bilong mipela wantaim olgeta level bilong gavman na lokol komyuniti long karimaut sastenebel projek insait long eria bilong helt, edukesen na infrastraksa olsem rot, bris na arapela.

Tim bilong mi i stap pinis long Nu Ailan long karimaut wanpela pailot projek we i sut long kamapim gutpela helt na klinpela hap bilong ol ples lain long hap bilong Wes Kos bilong Nu Ailan Provins. Insait long dispela pailot projek mipela wok klostu wantaim ATprojects, wanpela lokol PNG kampani, Nu Ailan Provinsel Gavman na Lokol Level Gavman long kamapim gutpela wara saplai na klinpela komyuniti. Mipela i kamapim wanpela wara saplai plen na sapos em pinis bai i givim gutpela klinpela wara saplai bilong kukim kaikai, dring na waswas insait long komyuniti.

Dispela pailot projek bai lukim tim i kamapim ol skul bilong skulim ol pipel long gutpela helt na senitesen pasin. Mipela i bhainim Community Led Total Sanitation (CLTS) aidia olsem rot bilong kirapim tingting na senisim pasin bilong ol ples lain. CLTS i save kamapim wok bilong skulim ol manmeri long kisim gutpela tingting long mekim ples i helti na klin na i no long wokim toilet tasol. Gutpela bilong dispela tingting em bikos olgeta komyuniti i stap insait na i no wanpela man o lain tasol.

Taim olgeta pipel i kisim gut skul na save long sait bilong helt na senitesen orait ol yet ken go pas long wokim ol gutpela toilet long ples.

Plis lukluk gen long narapela ripot bilong mi long save gut long ol wok bi long dispela pailot projek na wanem kain gutpela senis em kamapim long komyuniti long helt na gutpela sindaun bilong ol.

Long 2007 Nautilus Minerals i bin wok klostu long sapotim City Mission long kamapim ol wok bilong em gut. Program bilong Mission em long givim haus na skul trening long ol yangpela yut ken mekim sampela trening wok long ol ples bai ol ken stap longwe long ol poroman bilong ol we ol save raun wokim trabel. Taim yut i lainim na kisim gutpela save long mekim wok orait Mission i surukim wok bilong em go long ol taun eria long ol ken traim long painim wok. Mi amamas long tok olsem long las mun Nautilus Minerals bin givim mani go long Pot Mosbi City Mission. Dispela mani bai helpim Mission long go het wantaim ol wok bilong em long helpim ol yut bilong Papua Niugini.



Mel at the City Mission

Em gutpela taim bilong kampani na mipela lukluk fowet long go het long ol gutpela wok wantaim ol stekholdas bilong Solwara 1 Projek.

**Rigads  
Mel Togolo**

Stori bilong Nautilus Minerals inc.

Nautilus em i namba wan kampani long go daun aninit long solwara long painim bikpela polymetalik salfaid i stap insait long as bilong solwara na em i wok long kamapim namba wan projek long Solwara 1, insait long ol solwara bilong Papua Niugini, we em i laik kisim kopa na gol. Kampani i kisim tok orait pinis long ol envairenmen na maining permit. Sapos yu laikim moa toksave, rait i kam long: P O Box 1161, Port Moresby, NCD o lukluk long websait bilong mipela long:

[www.nautilusminerals.com](http://www.nautilusminerals.com) / [www.cares.nautilusminerals.com](http://www.cares.nautilusminerals.com)



# Wimen Grup long Ramu Projek eria kisim 3-pela nupela trak

**O**L MAMA grup na ol meri insait long Ramu NiCo Projek eria long Usino-Bundi na Raikos distrik mas sanap strong na wok bung-wantaim na lukim wanem nupela projek ol i laik kirapim i mas ron gut long helpim laipstail bilong ol meri long bihain taim.

Dispela em bikpela salens Mineral Risoses Atoriti (MRA) I givim ol mama grup bilong Kurumbukari (KBK), Inlen Paiplain (Maigari) Kostal Paiplain na Basamuk wimens grup.

Dispela em wanpela kain histori stret bikos em namba wan taim tru long ol meri long Ramu NiCo Projek eria i kisim kain helpim I kam long autsait long wokim agri-bisnis wok bilong ol.

Gutpela stori nau em olsem ol meri insait long Ramu NiCo Projek eria long Usino-Bundi na Raikos distrik long Madang provins nau i ken go kam long maket long kar na dinki bilong ol yet na mekim ol arapela bisnis.

Long las wik Sarere Sept 27, ol wimen grup bilong KBK, Inlen Paiplain (Maigari) na Kostal Paiplain i kisim ki bilong tripela nupela daina trak na ol mama long Basamuk i kisim wanpela dinki na bisnis long pigri long han bilong MRA aninit long mani-helpim i kam long Nesanel Gavman we Wol Benk i givim.

Ramu NiCo Projek Kodineta wantaim MRA, Carter Oiee i mekim strongpela toktok long ol mama na ol meri insait long Ramu NiCo Projek eria olsem ol i mas wok bung wantaim na kamapim wok long helpim sindaun bilong ol yet long ples na wan wan komyuniti bilong ol.

Mista Oiee i tok olsem dispela ol kar ol mama i kisim em no bilong wanpela meri, grup o husat wan wan lain. Em blong sapotim wok bilong olgeta mama long komyuniti.

"Yupela ol grup lida i go pas long wok mas wok olsem wanpela tim long lukim gutpela kaikai o frut bilong wok bilong yupela. Taim yupela i wokim gutpela wok ol pikinini na tumbuna long bihain taim bai amamas," Mista Oiee i tok.

Ol lain wimen grup i kisim ki bilong nupela trak em KBK Wimens

Grup, Inlen Paiplain na Kostal Paiplain. Wan wan ol dispela trak em K98, 000 na i kam olsem spesel prais long Ela Motors long Madang, we i lukim trak i gat naispela ruf na tu sit bilong pasindia sindaun em ol putim matres karamap long en.

Narapela wimens grup long Ramu NiCo Projek eria, Basamuk Wimens grup i kisim pigri projek we mani-helpim mak em moa long K90,000 bikos em bai karamapim tupela hap.

MRA Menesa Spesel Projek Yunit lukautim Wol Benk Maining Sekta Projek, Diclah Taureka i bin givim ki bilong tripela nupela trak i go long ol wimen lida bilong tripela wimen grup em KBK, Inlen Paiplain na Kostal Paiplain.

Bihain long Mista Taureka i givim ki long ol mama grup ya, em i givim salens long ol meri olsem ol i mas mekim dispela projek i kamap gut.

"Bikpela salens nau i stap long yupela ol mama long mekim dispela projek i wok gut," Mista Taureka i tok.

Vais Presiden (VP) bilong Ramu NiCo (MCC) Mista Wang Baowen tu i bin stap long dispela bung na i tokaut olsem Ramu Projek i stap insait long komisining stes bilong en yet, tasol Kampani bai sanap strong yet long halivim ol komyuniti insait long Projek eria bilong en.

Dispela foapela wimen grup insait long Ramu NiCo Projek i kisim projek i kam long Wol Benk we MRA i menesim. Dispela grent mani sapot i kam aninit long Nesanel Gavman Asisten Skim ol i kolim long Smol Grents Projek (SGP) bilong ol mama insait long ol eria we i gat maining operesen long en.

As-tingting bilong SGP em long helpim ol meri long kirapim ol smol bisnis o strongim ol bisnis we i stap pastaim wantaim bikpela tingting long helpim laipstail bilong ol meri long bihain taim insait long ol eria we maining i stap long en.

MRA Menesa Sasteinabiliti Plening, Stella Brere i askim dispela ol 4-pela wimens long lukautim gut stret ol dispela projek long helpim sindaun bilong ol long bihain taim.

Misis Brere i tok dispela em namba wan taim tru kain projek i


kam long Wol Benk we Nesanel Gavman i givim long MRA long menesim long luksave long hevi bilong ol mama o meri insait long maining projek eria long PNG.

"Mi laikim yupela ol mama i mas lukautim ol dispela Projek olsem bebi bilong yupela stret," Misis Brere i tok.

Em i tok ol arapela lain dona ejensi bai lukluk long wok na ripot bilong yupela. Sapos yupela menesim gut dispela projek nau yupela i kisim na em i karim gutpela kaikai, ating moa helpim bai kam bihain.

Ramu NiCo i helpim long putim 4-pela aplikesen long kisim helpim i kam long dispela SGP grent helpim. Gutpela wok na save bilong lain olsem Allan Wahwah long raitim gut proposal i karim kaikai stret na nau helpim i go long ol mama grup long Ramu Projek eria.

Allan i kisim sampela helpim i kam long Ramu NiCo bisnis divelopmen opisa, Brodney Seip na Jenda Opisa Agatha Yombai.



1. Tripela nupela trak bilong ol mama long Ramu NiCo Projek.

2. MRA Menesa Sasteinabiliti Plening, Stella Brere i askim dispela ol 4-pela wimens long lukautim gut stret ol dispela projek.

3. Ol mama wantaim Ramu NiCo na gavaman lain I sanap front long nupela kar bilong ol.

4. Ol mama long Inlen Paiplain kisim key bilong kar long Mista Taureka.



## Ramu NiCo redi long givim

Insait long moa long tupela yia, Ramu NiCo i sanapim pinis malti bilian Kina Ramu Nikel Projek, na nau mipela i redi long komisining.

Bihain long mipela i kisim olgeta tok orait na stretim ol teknikal wok redi, Ramu NiCo i go het wantaim bikpela wok konstraksen long namba tu hap bilong 2008. I kam inap nau, olgeta bikpela konstraksen wok long Krumbukari main sait na Basamuk rifaineri i pinis, na projek i stap redi long kisim komisining o tok orait long mekim wok. Long wol tu, dispela kain hariap sanapim em i no kamap bipo long wanpela kain bikpela projek olsem, na i daunim olgeta

salens bilong graun na masin bilong mekim wok.

**Ol dispela namba i soim kliia mak bilong wok mipela i pinisim:**

- Moa long 4.5 miliar kubik mita bilong graun wok i pinis
- Klostu 195,000 kubik mita simen i silip pinis
- Klostu 48,000 tan stil biding i sanap, hap long ol em ol nupela
- Moa long 2,000 yunit masin i sanap redi
- Moa long 227 kilomita bilong baret na proses paip i silip (antap long 135 kilomita slari paiplain)

**'Wanpela Ramu NiCo, Wanpela Komyuniti'**

# HOAC sapotim Okapa komyuniti

## Sape Metta i raitim

PAPUA Niugini i lukim pinis namba 39 yia bilong indipendens na planti ol distrik na provins i lukim pinis planti gutpela senis i kamap.

Tasol long wanpela distrik long Isten Hailans, em i no kisim ol gavman sevis na lukim tu wanpela gutpela senis ikamap.

Ol pipel long rurel Okapa distrik i wok long pilim pen na i wok long singaut nau long kisim ol sevis bilong gavman long stretim gut ol han rot we ol i ken yusim long karim ol kopi na gaden kaikai bilong ol i go i kam long maket long taun, edukesen na helt sevis.

Long wok egrikalsa, ol fama husat i save groim ol gaden kaikai na kopi i nidim helpim tu long strongim wok bilong ol. Tasol gavman long lokal na provinsal level i no lukluk long sapotim ol fama tu, olsem na wok bilong egrikalsa i no strong tumas long Okapa distrik.

Mekim olsem na wanpela lokal koporetiv Hailans Ogenik Egrikalsa Kopretiv (HOAC) i luksave long wari na hevi bilong ol pipel bilong Okapa, na em i wok long

helpim long sapotim egrikalsa, edukesen, helt sevis, stretim sampela seksen bilong ol han rot na kamapim tu ol wara saplai projek i go insait long ol hauslain long distrik.

Deputi kopretiv siaman Ricky Eno i tokim Wantok olsem, maski sapos gavman i no tingim ol pipel bilong Okapa, HOAC em i stap long helpim ol, long wanem, em i kopretiv bilong ol.

Em i tok, maski sapos kopretiv em i bin kirap na wok long liklik taim tasol, em i luksave long belpen na nid bilong ol pipel, olsem na em i wok long givim helpim long sapotim ol wantaim ol samting we bai i ken helpim ol long painim gutpela sindaun insait long ol wan wan hauslain komyuniti bilong ol.

Kopretiv siaman Daniel Kinne i tok amamas olsem FAIRTRADE ogenaísesen bilong Australia na Nu Silan i givim planti gutpela sapot we i helpim HOAC long kirap na wok long Okapa distrik.

Em i tok, nau yet, kopretiv i helpim na sapotim ol elemeneri na praimeru skul long rausim ol haus kunai



HOAC sapotim Okapa pipel... Siaman bilong Hailans Ogenik Egrikalsa Kopretiv Daniel Kinne (rait).

na sanapim ol gutpela haus.

I no longtaim i go pinis, HOAC i bin donetim 200 kopi palpa o kopi masin i go long ol fama na growa long Yasubi na Yagusa. Na em i redim tu ol arapela egrikalsa saplai

long givim i go long fama long ol arapela hauslain insait long Okapa.

"Mipela i no ejensi o bodi bilong gavman, tasol mipela i wok long sapotim ol lokal pipel bilong mipela, long

wanem, mipela laik olsem ol i mas apim stended bilong laipstail bilong ol na sindaun gut insait long wan wan komyuniti bilong ol," Mista Kinne i tok.

Em i tok amamas tu long patnasip program wantaim

FAIRTRADE Australia/New Zealand husat i amamas long givim han na sapotim HOAC long bringim ol besik (basic) sevis i go daun long ol liklik pipel long Okapa distrik.

## Gavana Naru helpim ol kopi fama

OL kopi fama na growa long ol ol ples longwe long Isten Hailans na Morobe provins i ken kisim helpim long salim ol beg kopi long ol liklik balus na i go long ol taun long prosesim na salim i go long ol ovasis maket.

Gavana bilong Morobe, Kelly Naru i bin kamap long opis bilong Coffee Industry Corporation (CIC) long Goroka na sainim Memorandum ov Agrimen (MoA)

wantaim ekting Sif Eksekutiv Opisa bilong CIC, Anton Benjamin, long silim o pasim tok orait long dispela dil bilong sabsidaisim ol pe bilong freit bilong balus long karim ol kopi beg i go long taun.

Mista Naru i tok amamas olsem provins bilong em bai wok wantaim CIC long sevim na helpim ol kopi growa na fama long Isten Hailans na Morobe provins.

Em i tok, Morobe provins

em i namba tri provins husat i save kamapim kopi bihainim Westen na Isten Hailans provins.

Mista Naru i tok, em i luksave long hatwok na belpen em ol kopi growa i save bungim, olsem na Morobe provinsal gavman aninit long lukaut bilong em i kamapim dispela tingting long wokbung wantaim CIC long daunim ol hevi bilong ol kopi fama.



Naru sapotim ol kopi fama... Amamas bihain sainim dil.... Morobe Gavana Kelly Naru (rait) na ekting Sif Eksekutiv opisa bilong Kopi Industri Kopresen (CIC) Anton Benjamin i amamas na apim kopi kap bihain long ol i sainim MoA. Foto: Sape Metta

## Safe Cities Program selebretim namba wan bonde

SAFE Cities Program i go hetim wok long mekim ol maket ples i seif na fri long ol mama na ol yangpela meri i mekim maket na tu, ol kastoma i go na baim ol gaden kaikai.

Gordons Maket i wanpela long ol maket insait long Mosbi Siti we Safe Cities Program i kamap na long las wik Fraide, Gordons Market Polis

Yunit i bin selebretim wanpela yia anivesari bilong em.

Sif Sajen Petrina Dikinn na ol meri bilong Safe Market Safe City Vendors Association i bin wokim selebresen we Metropolitan Supritenden, Andy Bawa, Polis Stesen komanda, Gordons Polis Stesen Komanda Mark Mosinakave, NCDC Maket divisin, NCDC Jenda na Yut Desk, UN Wimen na ol woklain bilong Nesenwaid

Maikro Benk i bin kamap long en.

Long toktok bilong en, Mista Bawa i tok PNG Polis fos i sapotim as tingting bilong Safe Cities Program we ol meri i ken pilim seif long wokim maket o go long maket long baim ol samting.

Em bin tok em i wok bilong olgeta long lukim olsem maket i seif ples na olsem em i bin tok tenkyu i go long ol venda long wok patna wantaim ol polis, NCDC na ol UN Wimen long wanpela yia.

Em i tok 11-pela mun i go pinis, sampela mama i wok long maket ausait long maket eria na sampela man no gut i wokim nabaut long ol.

Tasol wantaim sapot bilong UN Wimen na NCDC Safe Cities Program, ol meri i kamapim wanpela

asosiesen na wok gut wantaim long lukautim maket ples.

Ol venda i gat yunifom na putim long taim bilong wok, mekim ol wok, karimaut wok awenes na monitaim sefti long maket olgeta de.

NCDC, Dipatmen bilong Foren Afeas na Tred bilong Australia na Ministri bilong Foren Afeas na Tred bilong Nu Silan i fandim dispela program.

Long ol mun i kam, ol bai statim wok long stretim gut na bildim ol nupela haus maket insait long Gordons Maket.

"Bai yumi lukim seif, klinpela na gutpela ples we ol meri i ken mekim bisnis bilong ol, na ol manmeri long siti i ken pilim seif long go maket long en," Dokta Jeffrey Buchan husat i makim UN Wimen long PNG i tok.



HEPI BONDE: Katim keik long selebret namnba wan bonde bilong Safe Cities Program.

# PM 13 Kumuls kisim tupela nupela pilaia

HENRY Wan bilong Lae Snax Tigers na Kato Otio bilong Sauten Rijon bai pilai wantaim ol Praim Minista 13 Kumul long bikpela Praim Minista 13 pilai egensim Australia Kangaroos.

Kosa bilong ol Kumul, Mal Meninga, na Papua Niugini Ragbi Futbal Lig (PNGRFL) i bin mekim disisen long kisim dispela tupela pilaia bihain long ol i harim olsem Wellington Albert bilong Penrith Panthers na Luke Page bai no inap long pilai.

Wellington i kisim bagarap long han bilong em na ol dokta i tok em i no fit long pilai. Luke Page bai no inap long pilai bikos ol Canberra Raiders bai kisim long pilai wantaim ol long neks yia na ol i laikim em long redi gut bipo long em i go pilai wantaim ol.

Henry Wan bilong Lae Snax Tigers i bin pilai gut tru long dispela yia long posisen bilong em long fowod na Kato Otio i bin soim ol selekta olsem em i gat bikpela

save long taim em i soim stail bilong em long nesanel sempionsip we i bin kamap long las mun.

Mal Meninga i no amamas olsem Wellington Albert na Luke Page bai no inap long pilai tasol em i tok em i gutpela tu long givim sans long ol lokel pilaia bilong kantri husat i gat gutpela save long pilai tu.

"Mipela i bin makim bikpela skwat long dispela yia bikos mipela i bin gat tingting olsem sampela bai no inap givim tok orait long pilai.

Mipela i les tu long putim presa antap long ol pilaia husat bai no inap long pilai bikos mipela i les long bagarapim sindaun bilong ol," Mal Meninga i tok.

Mal Meninga i tok Wellington i no bin amamas taim ol dokta i tokim em long no ken pilai tasol em long gutpela bilong em na em i mas stap malolo na redi long pilai wantaim Panthers gen long neks yia.



Sif Ekseyutiv Opisa (CEO) bilong PNGRFL, Brad Tassel i sanap wantaim Kato Otio.

## Ol spot manmeri sapatim festival

PLANTI long ol spot manmeri bilong Papua Niugini i bin stap long sapatim Humen Raits Film Festival long las wiken.

Ol memba bilong Pot Mosbi Vipers i bin stap long dispela festival na toktok long gutpela bilong spot we i save helpim ol manmeri long planti rot.

Dairekta bilong dispela Film Festival, Alithia Baram-pataz, i tok ol i putim spot i go insait long program bilong dispela festival bikos ol i luksave olsem spot i save mekim planti gutpela samting long ol komyuniti.

"Bihain long ol spot manmeri i kam bek long Komonwelt Gems na nau ol i redi long Pasifik Gems, mipela i lukim planti gutpela samting long spot," Mis Baram-pataz



Ol pilaia bilong Pot Mosbi Vipers husat i bin stap long sapatim dispela Humen Raits Film Festival.

i tok.

Em i tok ol spot manmeri i gat sans long kamap gutpela manmeri insait long komyuniti na kantri, na planti yangpela manmeri i ken lukluk antap long ol spot manmeri, na bihainim rot ol i

bihainim.

Ragbi lig pilaia bilong Pot Mosbi Vipers, Samuel Koim, em i 25 krismas na em i amamas long sapatim komyuniti na pilai ragbi long wankain taim.

"Ragbi lig em i wanpela

strongpela gem long kantri, na mipela ol ragbi lig pilaia i wok strong long helpim na kamapim ol gutpela komyuniti," Samuel i tok.

Planti ol arapela spot manmeri tu i bin kamap long sapatim dispela festival.

## 7-pela Pasifik Gems memba i go long Australia

SEVENPELA memba bilong 2015 Pasifik Gems opis long Pot Mosbi i go long Sydney long Australia long lukim Sydney Yunivesiti Gems we i kamap long namba 28 Septemba na pinis long namba 3 de bilong mun Oktoba.

As bilong dispela wokabout bilong ol dispela lain em long lukim dispela pilai na kisim sampela gutpela ekspirians long rot bilong stap redi long neks yia long taim bilong Pasifik Gems.

Sif Eksekutiv Opisa (CEO) bilong Pasifik Gems Ogenaising Komiti, Peter Stewart, i tok em i gat strongpela bilip olsem dispela wokabout bilong ol memba bilong Pasifik Gems bai givim ol gutpela tingting long rot long stap redi na mekim gut dispela bikpela pilai.



Ol memba bilong Pasifik Gems Opis husat i go daun long Australia.



## Tok sori long leit Selan Paliau Wanpela spot man bilong PNG long bipo....

**L**EIT Selan Paliau i bin lusim laip long Fonde las wik long Lae. Em i bin dai taim em i stap long hap long mekim sampela wok.

Leit Selan em i wanpela man insait long kantri husat i gat rekot long spot insait long kantri. Spot laip bilong em i bin stat taim em i skul long sekenderi skul long Australia. Taim em i stap long Australia em i bin pilaim ol spot olsem ragbi yunien, kriket na volibal.

Bihain long em i lusim Australia na kam long PNG, em i bin pilai spot yet. Em i bin makim kantri long 1969 Saut Pasifik Gems long Pot Mosbi.

Long 1969 Saut Pasifik Gems, em i bin pilai ragbi yunien, na PNG i bin winim silva bihain long ol Fiji i winim ol long gren fainel 96-0 long Murray Bareks ples bilong pilai.

Bihain long makim kantri long pilai olsem wanpela spot man, em i bin kamap wanpela opisa wantaim Nesanel Spot Opis long Hohola. Em i bin wanpela man husat i bin givim laip bilong em long developim spot insait long dispela kantri.

Leit Selan i bin gat bikpela laik long kantri long kamapim Papua Niugini Spot Faundesen long lukautim olgeta developmen wok bilong spot insait long kantri, tru tumas olsem hat wok bilong em i karim kaikai taim yumi lukim na harim olsem PNG Spot Faundesen i wok strong long developim spot.

Bipo long em i kamap wanpela wokman bilong Papua Niugini Spot Komisen, em i bin wok olsem Spot Dairekta bilong Nesanel Kapital Distrik Komisen (NCDC).

Taim em i stap wantaim PNG Spot Komisen, ol i salim em i go long Lae long lukautim Momase Rijon.

Laspela bikpela wok em i mekim long helpim ol spot manmeri em long las yia taim em i stap olsem kosa bilong bis volibal tim PNG long Mini-Pasifik Gems long Wallis na Futuna long Maikronesia.

Leit Selan em i go long planti Pasifik Gems olsem pilaia na kosa, na em i dai wantaim planti ekspirians. Em i bin gat ekspirians long teknikel sait bilong spot tu, na tu, em i bin kwalifai long stap olsem wanpela referi bilong volibal.

Bipo long em i dai, em wantaim wanpela opisa bilong mipela long PNG Spot Faundesen, Peter Aglua, i stretim sampela pepa wok bilong PNG Spot Faundesen long helpim ol memba long kaunsil.

Dispela pepa wok em i mekim bai helpim PNG Spot Faundesen long ran gut na mekim wok stret.

Long makim maus bilong mi na famili bilong mi, na ol arapela husat i save long mi na em, mi laik tok bikpela bel sori i go long famili long leit Selan. Long meri bilong em Stella, na long ol pikinini.

Kantri bai misim wanpela wokman husat i givim taim na laip bilong em long helpim spot i develop.

**Lukim yu gen neks taim.....**

## PNGRFL makim wimens skwat

Isaac Liri i raitim

PAPUA Niugini Ragbi Futbal Lig (PNGRFL) i makim 34-pela meri long pilai long tupela wimens skwat long taim bilong Praim Minista 13 gem long Oktoba.

Ol nesanel selekta bilong PNGRFL i makim ol dispela meri taim ol i lukim pilai bilong ol long Nesanel Sempionsip long Lae long las mun.

Ol dispela meri bai nau gat sans long soim stail pilai bilong ol taim ol i pilai long Kokopo.

Bihain long dispela pilai ol selekta bai makim wan-

pela nesanel skwat bilong ol meri. Dispela nesanel skwat bilong ol meri bai pilai bai karim nem bilong kantri na pilai long intenesenel level long 2015.

Siaman bilong PNGRFL, Sandis Tsaka, i tok dispela skwat bilong ol meri em i gutpela bikos em bai strongim planti meri long pilai ragbi lig, na tu, pulim intres bilong ol meri long pilai ragbi lig long nau na long taim bihain.

"Mipela bai go het long putim mani long sapatim ol meri long ragbi lig bikos bipo ol i no bin gat wankain sans olsem ol man," Mista Tsaka i tok.

# Bulldogs o Rabbitohs?

## Husat tru bai win.....

TUPELA NRL tim we i pilai strong long dispela yia na kam long bung long gren fainel long salensim ol yet em Canterbury Bulldogs na South Sydney Rabbitohs.

Dispela tupela tim em ol tim bilong New South Wales yet, na tupela bai kamap wantaim wanpela strongpela pilai long dispela wiken (Sande).

Tupela tim i gat planti ol strongpela pilaia, na ol dispela pilaia bai autim olgeta stail bilong ol taim ol i salens.

Yumi long Papua Niugini i save bihainim gut tru NRL long wanem, planti manmeri i save laikim ragbi lig stret. Planti manmeri long kantri bai redi long lukim dispela tupela tim i salens long gren fainel.

Laspela taim bilong Souths long winim gren fainel em long 1971, na ol bai pilai strong long winim taitel bihain long planti yia i go pinis.

Bulldogs i bin winim taitel long tenpela yia i go pinis, na ol tu bai pilai strong long strongim gutpela nem bilong klap bilong ol.

Ol Bulldogs i gat wanpela gutpela kosa, Des Hasler,

husat i gat planti eksperiens long lidim ol tim i go pilai long gren fainel, em i tokim NRL olsem em bai no inap long luk daun long Rabbitohs, long wanem, ol Rabbitohs pilai strong tru long dispela yia.

Ol Rabbitohs i gat Greg Inglis na Lote Tuquri. Dispela tupela pilaia i gat eksperiens long pilai long gren fainel.



**BULLDOGS TRAI TAIM:** Wanpela pilaia bilong Bulldogs i skoim trai long semi-fainel long las wiken.

**SKOA PRELIMINERI FAINOL**

**Fraide: Septemba 26, 2014**

**ANZ Stadium**  
Rabbitohs 32 Roosters 22

**Sarare: Septemba 27, 2014**

**ANZ Stadium**  
Panthers 12 Bulldogs 18

### 2014 NRL GREN FAINOL DRO

**Sande: Oktoba 5, 2014**

**ANZ Stadium**

**South Sydney Rabbitohs** Vs **Bulldogs**



**ENNIS:** Kepten bilong Bulldogs, Michael Ennis, em i gat bikpela laik tru long pilai long gren fainel tasol em i bin kisim bagarap long lek bilong em taim ol i pilai long semi-fainel. Long dispela poto yu lukim em i wokabout namel long Josh Reynolds na Josh Morris.



**REYNOLDS:** Faiv eit bilong Bulldogs Josh Reynolds i kalap na amamas bihain long ol Bulldogs i skoim trai na autim ol Panthers long semi-fainel long las wiken. Bulldogs i winim Panthers 18-12. Reynolds em wanpela strongpela faiv eit, na Bulldogs bai nidim em long pilai strong long winim dispela gren fainel. Dispela em namba wan taim bilong Reynolds long pilai long gren fainel. Em i tokim NRL olsem em bai pilai strong long helpim Bulldogs long win.

**HODKINSON:** Trent Hodkinson i bin helpim ol New South Wales Blues long winim Stet ov Orijin long dispela yia. Em wanpela pilaia we Bulldogs bai lukluk long em long winim dispela gren fainel.



**1971:** Taim Souths i winim gren fainel long 1971.


**BURGESS:** Prop bilong Rabbitohs, Sam Burgess, bai pilai laspela gem bilong em wantaim Rabbitohs long dispela wiken.



**SOUTHS PAWA:** Ol sapota bilong Rabbitohs i weit longpela taim tumas long lukim tim bilong ol i pilai long gren fainel.

# OI spot poto long wiken...

OI Poto Isaac Liri.



Gems Viles bai lukim moa long 4000 spot manmeri na opisal i stap long en long taim bilong Pasifik Gems.

Tura amamas wantaim ol Steamships Trading ragbi sevens tim.



OI kriket pilaia bilong bihain taim, BSP i sapotim planti liklik pikinini long kriket long dispela yia.



Willie Minoga bilong Hunters wantaim namba 15 jesi bilong em.



Tura pilai wantaim ol liklik pikinini long las wiken.



Foapela yangpela etletiks mangi bilong Lae i redi long PNG Gems long Novemba.

**TOKSAVE:** Salim ol spots dro bilong yu kam long Feks; 325 2579, e-mel;[bveo@wantok.com.pg](mailto:bveo@wantok.com.pg) o kam lusim long Wantok Niuspepa opis long Able Building Complex long Central Waigani, NCD.



**TUNA IN OIL**

*Moa oil na meat insait*

# Ol spot fesiliti pulim ai bilong ol manmeri

Gems Viles bai kamap wanpela naispela hap na ol spot manmeri bilong Pasifik bai amamas.

**PLANTI ol spot fasiliti bilong 2015 Pasifik Gems i wok long luk nais long ai bilong ol manmeri taim ol i raun long Pot Mosbi.**

Minista bilong Spot, Justin Tkatchenko i tok 45 pesen bilong ol wok kontraksen i pinis na long mun Me long neks yia olgeta bai pinis na Pasifik Gems bai kamap.

Gems Viles long Pot Mosbi bai lukim moa long 4000 spot manmeri na opisal i stap long hap. Ol rum insait long ol dispela fasiliti em ol bikpela rum sais olsem 7 X 5 mita na wanwan rum bai gat toilet na ples bilong waswas. Foapela manmeri bai stap long wanwan rum.

Kampani we i go pas long mekim disain bilong Gems Viles em Waren and Mahoney, na Projek Menesa bilong dispela kampani, Bren Morrison, i tok envaironmen bilong Gems Viles bai kamap olsem wanpela ples we ol manmeri bai laikim tru, long wanem, ol liklik gaden bai stap tu long mekim ples i luk nais.

"Haus kuk bilong Gems Viles bai pinis klostu taim, na dispela haus kuk em i wanpela bikpela haus we inap long givim kaikai long 1000 manmeri long wanpela raun," Mista Morrison i tok.

Minista Tkatchenko i amamas tru long lukim Gems Viles long ai bilong

em, na em i tok olsem dispela Gems Viles em i gutpela moa long dispela long Glasgow long Skotland we ol Tim PNG i bin go stap long en taim ol i pilai long Komonwelt Gems long dispela yia.

"Ol dispela fasiliti ol i mekim wantaim strongpela simen, na ol i stap moa long 20 i go long 50 yia," Minista Tkatchenko i tok.

Em i tok yumi ol manmeri bilong Papua Niugini i mas amamas long dispela fasiliti na lukautim gut bikos em bai helpim yumi long planti rot.

*Lukim moa poto long pes 27*



**PM 13 Kumuls kisim tupela nupela pilaia - Pes 25**

**Eksen poto long NRL preliminarerai fainol - Pes 26**



# PMV

**DIESEL OIL**



# PMV OIL BILONG YUMI

**BOROKO MOTORS**

PORT MORESBY	☎	325 5255
LAE	☎	472 1144
MT HAGEN	☎	542 1933
TABUBIL	☎	649 9048
KIMBE	☎	983 5035
MADANG	☎	422 2658
KOKOPO	☎	982 8193
GOROKA	☎	532 3552

Email: info@borokomotors.com.pg  
Website: www.boroko-motors.com